

ఎబ్రి లోకురిజ్ రాస్తి ఉత్తమ్దిజ్ నెల్వ కిబిసినిక

ఇస్రాయేలు లోకుర్ అయ్గుప్తు దేసమ్దు వెటిపణి కిజి మహార్. వారు నండొ బాదెజ్ ఆజి మహార్. దేవుణు ఇస్రాయేలు లోకురిజ్ అయ్గుప్తు దెసమ్దాన్ డిస్పిసి, కానాను దేసమ్దు ఒత్తెజ్ ఇజి, మోసె వరిజ్ నడిపిసి తత్తాన్. కానాను దేసమ్నె వరిజ్ సీన ఇజి దేవుణు వరిజ్ ఒట్టు కిత్తాన్, వారు పయనం కిజి మహి వలె, మోసె వెట దేవుణు వరిజ్ పది ఆత్తెజ్ సీజినాన్. దన్ని వెట దేవుణు వెహ్సినాన్, “నాను వరి నడిమి మండ్రెజ్ ఇజి నా వందిజ్ నెగ్గి ఇల్లు లెకెండ్ మంజిని ఉండ్రీ గుడారం తొహ్తెజ్”, ఇజి (నిర్గమ 25:8). యాక ఎలాగ తొహ్తెజ్ ఇజి గుర్తులెకెండ్ ఉండ్రీ రూపు దేవుణు మోసెజ్ తోరిసినాన్. “నాను మిజి సుడేజి, మీ వెట అబ్బె వర్గిన”, ఇజి దేవుణు వెహ్తాన్ (నిర్గమ 29:42). అందెజె, దేవుణు మంజిని ఉండ్రీ బాడ్డినె గుడారం. దేవుణు మంజిని బాడ్డిదిజ్ పొలిత మనాద్ యా గుడారం (ఎబ్రి 9:11).

పుజేరిజు - యూదురి మతమ్దు, లేవి తెగాదు మన్ని వరిజె, పుజేరిజు ఇజి ఏర్పాటు కినార్. మహి తెగాదికార్ విరిజ్ పరి దసమ్బాగం సీదెజ్. పుజేరిజు ఆవండ, పెరి పుజేరిజు ఇజి, విజేరె పుజేరిజు మున్సు మన్ని పెరి పుజేరిజు ఇజి నండొండార్బా మహార్. ఉండ్రీ కాలమ్దు విజేరె పుజేరిజు మున్సు మన్ని పెరి పుజేరి ఇజి దేవుణు తొలిత ఏర్పాటు కిత్తాన్*. పుజేరిజు దేవుణుదిజ్ ఒద్దె కెట ఆతి గదిదు డుగ్గిజి సేవ కిత్తార్. గాని విజేరె పుజేరిజు మున్సు మని పెరి పుజేరి ఒరెండ్రె దేవుణుదిజ్ ఒద్దె కేట ఆతి గదిదు డుగ్గిజి సేవ కిత్తాన్. ఏలు యేసు మా వందిజ్ విజేరె పుజేరిజు మున్సు మన్ని పెరి పుజేరి వజి వాత మనాన్.

* 0: 1:0 ఎబ్రి 5:4

గుడారం - దేవుణు మోసెజ్ తోరిన్తి రూపు వజ తయార్ కిత్తి ఉండ్రి టంబు గుడుసని దన్నిలోఇ మన్ని వనక వందిజ్ నె గుడారం ఇనార్. ఇబ్బెనె దేవుణు వన్ని లోకుర్ వెట వర్గినాన్. టంబు గుడుసని రుండి గద్దిజ్ మన్నె. దేవుణు వందిజ్ కేట ఆతి గదిని దేవుణు వందిజ్ ఒద్దె కెట ఆతి గది ఇజి రుండి మన్నె. యా రుండి గదిజ్ బా దేవుణు వందిజ్ కేట ఆతి ఇట్టికెజె. ఉండ్రి తెరనె యా రుండి గదిజ కేట కేట కితాద్. తెర, నీరి దుపాటి లెకెండ్ మనాద్. రుండి గదిజ నడిమి డొయె ఆత మనాద్. అయాక నండ్ దలం మన్నిక, నండ్ సొకుదాన్ అట మనార్.

దేవుణుదిజ్ కేట ఆతి గది - దేవుణుదిజ్ కేట ఆతి గది పెరిక. దన్నిజ్ 30 మూరెజ్ నీరిండ్, 15 మూరెజ్ ఒసార్ మహాద్. దిన్ని లోఇ దేవుణు ఎద్రు రొటెజ్ ఇడ్డి బల్ల ఉండ్రి కల్లితి సిల్లి బజారమ్దాన్ తయార్ కిత్తి దీవెజ్ డండి ఉండ్రి, దేవుణుదిజ్ దూపం సురుని మాలి పెటె ఉండ్రి, మన్నె.

1 దేవుణు ఎద్రు రొటెజ్ ఇడ్డి బల్ల

దేవుణుదిజ్ కేట ఆతి గదిది ఉణెర్ పడకాదు యా బల్ల మంజినాద్. యాక తుంబ మరాతి సెక్కెజాణిజ్ తయార్ కిత్తిక. దిన్ని మున్ను కల్లిసిల్లి బజారమ్దాన్ పూత రాస్త మనాద్. దేవుణు ఎద్రు ఇడ్డి రొటెజ్ ఎస్తెవలెబ దిన్ని మున్ను మంజినె. యూదురి ఆసారం వజ యా రొటెజ్ ఉండ్రి పలెమ్దు, రుండి వరెజ్ ఆరు దొత్తిజ్ మంజినె. విస్త్రాంతి దినమ్దునె యాకెజ్ మారిసి మరి కొత్తకెజ్ ఇడ్డూర్. అయా పడాయి రొటెజ్ పుజెరిబునె తిండ్రెజ్. మరి ఎయెర్బా తిండ్రెజ్ ఆవద్. లేవి తెగాదు మన్నికారె, యా రొటెజ్ తయార్ కినార్. విస్త్రాంతి దినమ్దిజ్ ముజాల మన్ని రెయునె తయార్ కినార్.†

2 కల్తి సిల్లి బజారమ్దాన్ తయార్ కిత్తి దీవ డండిజ్

యా డండిజ్ కల్తి సిల్లి బజారమ్దాన్ తయార్ కిత్తిక్కాదె. దేవుణు వందిజ్ కేట ఆతి గదిది డేబ్ర పడకాద్ మంజినాద్. యా కంతుదు ఏడు

† 0: 1:0 లేవి 24:5-9

దీవెజ్ మంజినె. దిన్ని ముజాల మన్ని బాడ్డిదు జాయ్ మండ్రెజ్ నె యాక మంజినాద్. ఒరెన్ పుజేరి పెందల్ కని పొదొయ్ క కనిసి మంజినాన్.‡

3 దూపం సుర్ని మాలి పెటె

యాక, నడిమి డెర డగ్రు మంజినాద్. దిన్ని ముస్సు దూపమ్ నె ఆవిండ మరి ఇనికబా కూలిజ్ నొ, జంతుజ్ నొ పార పొట్టిజ్ నొ సుర్ దెజ్ ఆవద్. పెందల్ కని పొదొయ్ క దూపం సుర్నార్. గాని యాక దేవుణు వందిజ్ ఒద్దె కేట ఆతి గదిదు మన్ని ఉండ్రి వస్తు. అందెజె, దేవుణు వందిజ్ ఒద్దె కేట ఆతి గదిదు మంజినక ఇజి ఒడేబిజినాన్.§

దేవుణు వందిజ్ ఒద్దె కేట ఆతి గది - దేవుణు వందిజ్ ఒద్దె కేట ఆతి గది నీరిండ్, ఒసార్ ఉండ్రి సమానమ్ నె. 15 మూరెజ్ మన్నె. దిన్ని లొఇ మందసం మనాద్. మందసం ఇహిజ ఉండ్రి పెటె. యాక దేవుణు మనాన్ ఇజి ఉండ్రి గుర్తు లెకెండ్ మనాద్. దేవుణుదిజ్ కేట ఆతి గదిదిజ్ ని ఒద్దె కేట ఆతి గదిదిజ్ నడిమి ఉండ్రి డెర అడ్డు మనాద్. యా డెర నండ్ దలం మన్నిక. నండ్ కరీదిక. దిన్ని ముస్సు నండ్ సోకుదాన్ అటార్. దేవుణు వందిజ్ ఒద్దె కేట ఆతి గదిదు విజేరి పుజేరిజ ముస్సు పెరి పుజేరి ఒరెండ్రి సొనాన్. మరి ఎయెన్ బ సొన్ ఎన్. వాండ్రుబా ఏంటుదిజ్ ఒర్పునె, సొనాన్. లోకురి విజెరె పాపమ్ క వందిజ్ పూజ సీదెజ్ ఉండ్రి రోజు మనాద్. నాండిజె డెర పెర్జి, లొఇ సొనాన్.*

యేసు మా వందిజ్ విజెరె పుజేరిజ ముస్సు మన్ని పెరి పుజేరి ఆత మనాన్. వాండ్రు సిలువాదు సాతిజ్, పాపమ్ క వందిజ్ ఎలాకాలం వందిజ్ ఉండ్రి సుట్టు పూజ లెకెండ్ వన్నిజ్ వాండ్రె ఒవజెపె ఆతాన్.† యేసు సిలువాదు సాతి గడియాదు దేవుణు గుడిదు దేవుణు వందిజ్ కేట ఆతి గదిదిజ్ ని దేవుణు వందిజ్ ఒద్దె కేట ఆతి గదిదిజ్ నడిమి మహి డెర, ముస్సుహాన్ అడిగిదాక రుండి బదెజ్ ఆజి కింజితాద్.‡ ముజాల డెర పెర్జి విజేరె పుజేరిజ ముస్సు మన్ని పెరి పుజేరి ఒరెండ్రి

‡ 0: 1:0 నిర్గమ 26:35 § 0: 1:0 ఏబ్రి 9:4, 1రాజు 6:22 * 0: 1:0 ఏబ్రి 9:27

† 0: 1:0 ఏబ్రి 7:27 ‡ 0: 1:0 మత్తయి 27:51

దేవుణు వెట వర్గదెజ్ లొఇ డుగ్నాన్. గాని క్రిస్తు సాతిజ్, వన్ని ముస్సు నమకం ఇడ్చి ఎయెన్బా దేవుణు డగ్రు సొండ్రెజ్ అట్నాన్. మరి పూజదిజ్ అవ్సరమ్బా సిల్లెద్.

మందనం - మందనం ఉండ్రె దేవుణు వందిజ్ కేట ఆతి గదిదు మన్ని వస్తు. మందనం ఇహిజ ఉండ్రె పెటెనె. యాక తుంబ మరాతి సెక్కెజాణిజ్ తయార్ కిజి దిన్ని ముస్సుని లొఇ కల్తి సిల్లి బజారమ్దాన్ పూత రాసె ఆతమనాద్. దిన్ని ముస్సు ఉండ్రె మూత మనాద్. అయాకబా కల్తి సిల్లి బజారమ్దాన్ పూత రాసె ఆత మనాద్. అయాక మూత నెక్కి ముద కిదెజ్ ఆనాద్. లాగ్జి సాప్తెజ్బా ఆనాద్.† యా మూతదిజ్ “కరుణ పీటం” ఇనాన్.* కరుణ పీటం ఇహిజ, పావమ్కు సెమిన్ని బాడ్డి ఇజి అర్దం. కరుణ పీటం ముస్సు కెరూబుజ్ మన్నె. కెరూబుజ్ లోకు మూర్తి వజనె మన్నె గాని రెక్కెజ్ మన్నె. యా కెరూబుజ్ ఇతాన్ ఉండ్రె ఆతాన్ ఉండ్రె ఎద్రు నిల్లి, కరుణ పీటమ్దునె బేసి రెక్కెజ్ కోరిస్తె మన్నె.† కెరూబుజ్ నడిమి మొసాప్ మనాద్. కరుణా పీటం ముస్సు యా మొసాప్దు దేవుణు మంజినాన్. పరిసుద్దమాతి దేవుణు యా లెకెండ్ బాన్ మంజినాన్. అందెజె ఇని సెఇకాన్ నొ తప్పు కిత్తికాన్ నొ బాన్ కరుణ పీటం డగ్రు సొండ్రెజ్ అట్వన్. గాని దేవుణు ఏర్పాటు కిత్తి విజేరె పుజేరిజ ముస్సు మన్ని పెరి పుజేరి ఒరెండ్రె సొండ్రెజ్ అట్నాన్. వాండ్రుబా వన్ని సొంత ఇస్టమ్దాన్ నొ, పూజ కిత్తి దన్ని నల సిల్లెండ్రె సొండ్రెజ్ ఆవద్. యా లెకెండ్ సిల్లెండ్రె సొహిజ వాండ్రు నిజం సానాన్.

మందనమ్దు మన్నికెజ్ - మందనమ్దు దేవుణు మోసెజ్ సిత్తి పది ఆడ్రెజ్ రాస్తి మన్ని రుండి పల్కెజ్ మన్నె. కల్తిసిల్లి బజారమ్దాన్ తయార్ కిత్తి జగ్గుదు మన్నా మనాద్. మరి, సిగిరిస్తిమన్ని, అహారోసు డుడ్డుబా మనాద్.

మన్నా ఇహిజ తెలాని గింజ లెకెండ్ మనాద్. తేనె నూనె లెకెండ్ రుసి మంజినాద్. దేవుణు ఇస్రాయేలు లోకురిజ్ బిడిమ్ బూమిదు

నడిపిసి మహివలె వరిజ్ తిండ్రెజ్ యాక సిత్తాన్.‡

పది ఆడ్రెజ్ రాస్తి ఇడ్డి పల్కెజ్ - యా పల్కెజ్ పణకాణిజ్ తయార్ కిత్తికెజె. నన్ని పల్కెజ ఆడ్రెజ్ గీస్త మనాద్.§

డేవ - డేవ నడిమి టంబు గుడ్డున మనాద్. డేవ సుటులం వెల్గు మనాద్. దిన్నిజ్ ఉండ్రీ సరి మానాద్. డేవదు సంత సుర్ని మాలి పీటని నొర్బాదెజ్ ఏరు ఇడ్డి పలెం మన్నె.

సంత సుర్ని మాలి పీట - యాక తుంబ మరాతి నెక్కెజాణిజ్ తయార్ కిత్తిక. దిన్ని ముస్సు కంసు పూత రాస్త మనాద్. ఇబ్బెనె సంద సుర్ని పూజ కినార్. యా పీటదు సిసు ఎస్తివలెబా నమ్బివిండ కసినె మండ్రెజ్, యా మాలి పీట సరి డగ్గు మంజినాద్.

నొర్బాదెజ్ ఏరు ఇడ్డి పలెం - యా పల్లెం సంద సుర్ని మాలి పీటని, గుడారం నడిమి మంజినాద్. యాకబా కంసుదాన్ తయార్ కిత్తిక. పుజేరిజు పూజ కిని ముజాల్ నొ, గుడారమ్ లొఇ సొని ముజాల్ నొ నొర్బాదెజ్ ఏరు ఇడ్డికాదె యాక.

ఏబ్రి లోకురిజ్ రాస్తి ఉత్తం

నెల్వ కిబిసినిక

ఏబ్రి లోకురిజ్ రాసిని ఉత్తమ్ నె యాక. ఏబ్రి లోకుర్ ఇహిజ, క్రిస్తు ముస్సు నమకం ఇట్టి యుదురి లోకుర్. యా ఉత్తం రాస్తికాన్ ఎయెన్ ఇజి తెలివద్. యేసు ప్రబునె, దూతారిజ్ ఇంక మోసెజ్ ఇంక, మోసె సితి రూలు వజ పుజేరి పణి కిజిని పెరి పుజేరిజ ఇంక గొప్ప పెరికాన్ ఇజి యా ఉత్తమ్దు వెప్పినాద్. పూజెజ్ లోకురి పాపమ్కు సొన్ పిన్ ఉ. గాని యేసు ప్రబు పూజ ఆతి దన్నితాన్ నె లోకురి పాపమ్కు సొనె. వన్ని నలదాన్ నె, లోకుర్ సుబ్బరం ఆనార్. దేవుణు డగ్గు దయరమ్దాన్ మండ్రెజ్ అట్నార్. అయాలెకెండ, కొత్త ఒప్పమానం నడిపిస్సికాండ్రె యేసు ఇజి వెప్పినాద్. మరి దేవుణు ముస్సు నమకం ఇట్టి పూర్బమ్దు బత్తిజి మహి నండొండార్ వరిజ్

‡ 0: 1:0 నిర్గమ 16:14-31 § 0: 1:0 నిర్గమ 31:18

వెప్పినాన్. కండెవెరిదు, నమ్మితి లోకుర్ ఎలాగ మండ్రెజ్ ఇజి యా ఉత్తమ్దు వెప్పినాన్.

¹ పూర్బమ్దు, ఆఇ ఆఇ నండొ సమయమ్దు, నండొ రకమ్కాణిజ్, దేవుణు ప్రవక్తరు వెట మా అనిగొగొరిజ్ వర్గితాన్.

² గాని యా కడెవెరి దినమ్కాజ్, వాండ్రు వన్ని మరిన్ వెట మజి వర్గితాన్. వన్ని వెటనె బూలోకమ్ని దని లొఇ మనికెజ్ విజు దేవుణు తయార్ కిత్తాన్. వన్నిజె, విజు దనిజ్ అక్కు మనికాన్ ఇజి ఏర్పాటు కిత్తాన్.

³ దేవుణు గొప్ప పెరికాన్ ఇజి తోరిన్నికాండ్రె మర్రిన్. వన్ని లెకెండె వీండ్రు మనాన్. గొప్ప సత్తు మని వన్ని మాటదాన్, బూలోకమ్దు మని విజు వన్కాజ్ వీండ్రు నడిపిసినాన్. లోకురి పాపమ్కు నొందెజ్ వాండ్రు సాతి వెనుక, గొప్ప పెరి దేవుణు ఉణెర్ పడకాదు అతికారమ్దు బస్తాన్.

⁴ అందెజె, వాండ్రు దూతార్ ముస్సు గొప్ప పెరికాన్ ఆతాన్. దూతార్ పేర్కు ముస్సు దేవుణు వన్నిజ్ సితి పేరు గొప్ప పెరిక మని లెకెండె, వాండ్రు పెరికాన్ ఆతాన్.

⁵ ఎందనిజ్ ఇహిజు, దేవుణు యేనుప్రబుజ్నె ఆవిండ, వన్ని దూతారిజ్ ఎయెరిజ్బా ఎసెజ్బా వెహ్ఎతాన్, “నీను నా మర్రిన్. నేండ్రు నానె నీ బుబ్బ ఆత మన”,[☆] ఇజి. మరి, దేవుణు దూతారిజ్ ఎయెరిజ్బా ఎసెజ్బా వెహ్ఎతాన్”, నానె వన్ని బుబ్బ ఆన. వాండ్రె నా మరిన్ ఆనాన్లె”,[☆] ఇజి.

⁶ మరి, దేవుణు వన్ని లొల్సుర్ కొడెడిజ్ యా లోకమ్దు తపిసిని వలె, వెప్పినాన్, “దేవుణు దూతార్ విజెరె వన్నిజ్ పొగిడిజి మాడిస్తెజ్వలె”,[☆] ఇజి.

⁷ దూతార్ వందెజ్ వెప్పినివలె, వాండ్రు ఈహు వెప్పినాన్, “గాలి లెకెండె వన్ని దూతారిజ్ తయార్ కిజినాన్, కసిన్ని సిను లెకెండె, వన్ని

☆ 1:5 1:5 కిర్తన 2:7. ☆ 1:5 1:5 1సము 7:14; 1దినరు 17:13. ☆ 1:6 1:6 ద్వితి 32:43.

పణి మణిసిరిజ్ తయార్ కిజినాన్”, ☆ ఇజి.

8 గాని వన్ని మరిన్ వందిజ్ ఈహు వెహ్సినాన్, “ఓ దేవుణు, నీను బన్ని సిమాసనం అంతు సిల్లెండ ఎల్లాకలం మంజినాద్. నీను నీతి నిజాయితీదాన్ రాజు వజ వలుబడికిని.

9 నీను నిజమాతి దనిజ్ ప్రేమిస్తా మని. నెఇ దనిజ్ దూసిస్తా మని. అందెజె, నీ దేవుణు ఆతి దేవుణు నిజి ఎర్లిసి సర్ద ఆని గొప్ప గనం సితాన్. యాక నీ జత మని వరిజ్ నీతి దన్నిజ్ ఇంక నండొ గొప్ప పెరిక”, ☆ ఇజి, దేవుణు మరిన్ వందిజ్ వెహ్సినాన్.

10 వాండ్రు మరి వెహ్సినాన్, “ఓ ప్రబువా, లోకం పుటిన్ఎండ ముజాలె, యా లోకమ్దిజ్ పునాది ఇడ్డికి నీనె. ఆగాసం తయార్ కితికి నీనె.

11 అయాకెజ్ విజు నాసనం ఆనె. గాని నీను మంజిని. పాత పణిదిజ్ రెఎండ ప్పడాఁయిక ఆనిలెకెండ అయాకెజ్ విజు పణిదిజ్ రెఎండ పడాఁయికెజ్ ఆనె.

12 పంసె మడఁత కినిలెకెండ, నీను వన్కాజ్ మడఁత కిని. పాత మారిసిని లెకెండ, వన్కాజ్ మారిసిని. గాని నీను ఎలాకాలం ఉండ్రె లెకెండె మంజిని. నీను ఎసెజ్బా డొక్ర అఇ”, ☆ ఇజి.

13 దేవుణు వన్ని దూతార్ ఎయెరిజ్బా ఎసెజ్బా వెహ్ఎతాన్, “నాను నీ పగాతి వరిజ్ నీ పాదమ్క అడికి ఇడ్పిదాక, నీను నా ఉణెర్ పడఁకాద్ మసి మన్అ”, ☆ ఇజి.

14 అహిజ, దూతార్ ఎయెర్? వారు విజెరె దేవుణుదిజ్ సేవ కిని ఆత్మెజ్నె. దేవుణు రక్సిసిని వరిజ్ సాయం కిదెజ్, వాండ్రు పొక్తికారె.

2

యేసు రక్సిస్నాన్ ఇని నిజమాతి పెరి సజతి నెక్సిపొక్ఎండ జాగర్త వెండ్రెజ్.

1 అందెజె మాటు వెహిమని నిజమాతి సజతిజ్, మరి నండొ జాగర్తదాన్ వెండ్రెజ్ వలె. ఎందనిజ్ ఇహిజ, దని బాణిజ్ దూరం ఆవిండ మంజిని వందిజె.

☆ 1:7 1:7 క్రిస్త 104:4. ☆ 1:9 1:9 క్రిస్త 45:6,7. ☆ 1:12 1:12 క్రిస్త 102:25-27. ☆ 1:13 1:13 క్రిస్త 110:1.

2 దేవుణు దూతారిజ్ వాండ్రు వెహ్పిన్తి మాటెజ్, నిజం ఇజి రుజుప్ ఆత మనాద్. అయా మాటెజ్ తప్పికాన్, లోజిఇకాన్ ఎయెన్ ఆతిజ్బా, తగితి సిక్స వన్నిజ్ దొహ్క మనాద్.

3 అహిజ, దేవుణు లోకురిజ్ సిక్సదాన్ ఎలాగ గెల్పిస్తెజ్ ఇజి వెహ్పిని ముకెలమాతి బోద మాటు నమ్మిదెజ్ కెఇతిజ, అయా సిక్సదాన్ ఎలాగ తప్తె ఆదెజ్ అట్నాట్? గెల్పిస్సి వందిజ్ మని యా బోద ప్రబునె తొలిత వెహ్కాన్. వాండ్రు వెహ్కెజ్ వెహ్కార్, అయాక నిజం ఇజి మజి రుజుప్ కిత్తార్.

4 మరి, దేవుణుబా విజు రకమ్కాణి సత్తుమని పణిజ్, గొప్పు బమ్మాని పణిజ్ కిజి రక్సణ వందిజ్ వెహ్కా నిజం ఇజి రుజుప్ కిత్తాన్. వన్నిజ్ ఇన్టం ఆతివజ, దేవుణు అత్తెజ్ సీబాజి సీజి దేవుణు రుజుప్ కిత్తాన్.

యేసుప్రబునె లోకురిజ్ రక్సిస్సికాన్.

5 వాజిని కాలమ్ది లోకం ఏలుబడిః కిదెజ్ దేవుణు, దూతారిజ్ ఒపజెప్వెతాన్. పరలోకం వందిజె మాటు వర్గిజనాట్.

6 గాని దేవుణు మాటదు ఎంబెనొ ఎయెండ్రొ డటిసి ఈహు వెహ్పినాన్, “ఓ దేవుణు, నీను ఎత్తు కిదెజ్ లోకు ఏపటిదికాన్? నీను బాగ సుడ్డెదెజ్ లోకు ఏపటిదికాన్?”

7 నీను దూతారిజ్ ఇంక వన్నిజ్ సణెం ఇజ్రికాన్ కితి. నీను వన్నిజ్ పెరికాన్ కితి. గవరవమ్దిజ్ తగ్గికాన్ లెకెండ్ కితి.

8 విజు వన్కాజ్ ముస్సు వన్నిజ్ అతికారం సితీ* ✱. లోకురిజ్ విజు వన్కాజ్ ముస్సు దేవుణు అతికారం సితీ”, ఇజి వెహ్పినాన్. ఇహిజ, విజు వన్కాజ్ ముస్సు అతికారం వన్నిజ్ మనాద్. గాని ఏలు, లోకుర్ విజు వన్కాజ్ ముస్సు అతికారం కిజినిక తొవట్.

9 గాని ఏలు, యేసుజ్ గొప్పు గనమ్దాన్, గొప్పు గవరవమ్దాన్ దేవుణు పెరికాన్ కితిక మాటు సుడ్డెజినాట్. ఎందనిజ్ ఇహిజ, వాండ్రు నండొ బాదెజ్ ఓరిసి సాతాన్. వన్నిజ్ దూతారిజ్ ఇంక సణెం దేవుణు ఇజ్రికాన్ కిత్తాన్. ఎందనిజ్ ఇహిజ, వాండ్రు యా లెకెండ్

✱ 2:8 2:8 కీర్తన 8:4-6.

లోకుర్ విజెరె వందిజ్ సాదెజ్. యా లెకెండ్, దేవుణు దయా దర్మం క్రితాన్.

10 విజు, దేవుణు తయార్ క్రితాన్. విజు వన్నివందిజె తయార్ క్రితాన్. యేసుప్రబు బాదెజ్ ఓరిసి సాజిని దనితాన్ దేవుణు వన్నిజ్ పూర్తి కిజినాన్. వాండ్రు పూర్తి ఆతికాన్ ఆతాన్. అయ లెకెండ్ యేసుజ్ పూర్తి కిజినిక తగ్గికాదె. ఎందనిజ్ ఇహిజు, నండొ కొడొరిజ్ వాండ్రు ఎలాకాలం దేవుణు వెట బత్కిని బత్కుదు నడిపిస్తెజ్. యేసునె వరిజ్ రక్కణదు నడిపిస్తాన్.

11 వాండ్రె లోకురిజ్ దేవుణు వందిజ్ కేట ఆతి వరి లెకెండ్ కిజినాన్. వన్నిజ్ని వాండ్రు దేవుణు వందిజ్ కేట కిత్తి లోకురిజ్, బుబ్బు ఒరెండ్రె. అందెజె వరిజ్ తంబెరిజు ఇజి కూక్తెజ్ యేసు సిగు ఆవన్.

12 వాండ్రు దేవుణుదిజ్ వెహ్సినాన్, “నీ వందిజ్ నాను నా తంబెరిజు వెహ్స, నీ లోకుర్ కూడొనిబాన్, నాను నిజీ పొగిడిన”☆ ఇజి.

13 మరి వాండ్రు వెహ్సినాన్, “నాను వన్ని ముస్సు నా నమకం ఇడ్ను”☆ ఇజి. మరి బా వెహ్సినాన్, “ఇదిలో, నానుని దేవుణు నజీ సితి కొడొరి”☆ ఇజి.

14 దేవుణు కొడొర్ నలని, కండదాన్ తయార్ ఆతి లోకుర్నె. అందెజె యేసుప్రబుబా నలని, కండదాన్ తయార్ ఆతి లోకు వజ ఆతాన్. ఎందనిజ్ లోకు ఆతాన్ ఇహిజు, ఒరెన్ లోకు వజనె సాదెజ్ అట్నాన్. వాండ్రు సాజినె, సావు ముస్సు అతికారం మని సయ్తానుజ్ సిల్లెండ కిదెజ్ అట్నాన్.

15 అయా లెకెండ్, సావుదిజ్ తియెల్ ఆజి, వరి బత్కు విజు సావు తియెల్దిజ్ అడిగి మని విజెరిజ్ డిన్పిస్తెజ్ అట్నాన్.

16 నిజమె, వాండ్రు దూతారిజ్ సాయం కిఎన్. గాని అబ్రాహము* తెగ్గాది వరిజ్ సాయం కిజినాన్.

17 దిన్ని వందిజ్, వాండ్రు ఎల్లగాతిజ్బా వన్ని తంబెరిజు లెకెండ్ అదెజ్వలె. ఎందనిజ్ ఇహిజు, వాండ్రు నండొ కనికారం మని, నమ్మిదెజ్

☆ 2:12 2:12 క్రిస్తన 22:22. ☆ 2:13 2:13 యెసయ 8:17. ☆ 2:13 2:13

యెసయ 8:18. * 2:16 2:16 అబ్రాహము తెగాతికార్ ఇజి వెహ్సినాన్ దేవుణు లోకుర్ వందిజె.

తగ్గి పెరి పుజెరి ఇజి, దేవుణుదిజ్ సేవ కిదెజ్ మరి, లోకురి పాపమ్క వందిజ్ పూజ కిదెజ్.

18 వాండ్రె పరిసెజ్ కిబె ఆజి, బాదెజ్ ఆతాన్. అందెజె పరిసెజ్ కిబె ఆని వరిజ్ సాయం కిదెజ్ అట్వాన్.

3

యేసు మోసె మున్సు పెరికాన్.

1 అందెజె దేవుణు వందిజ్ కేట ఆతి, దేవుణు కూకె ఆతి తంబెరిజాండె, యేసుప్రబుజ్ ఎత్తు కిదు. వాండ్రె, దేవుణు పోక్తి అపొస్తడుః ఇజి, విజెరె పుజెరిజ మున్సు పెరి పుజెరి ఇజి, మాటు నమ్మిజి ఒప్పుకొడిఃజినాట్.

2 దేవుణు కుటుమ్ది వరిజ్ విజెరిజ్ మోసె నమ్మకమ్దాన్ సేవ కితి లెకెండ, వీండ్రుబా వన్నిజ్ పణి ఒపజెప్తి దేవుణుదిజ్ నమ్మకమ్దాన్ సేవ కిత్తాన్.

3 ఉండ్రె ఇల్లుదిజ్ ఇంక ఇల్లు తొహిన్తి వన్నిజె గొప్ప గనం వానాద్. అయాలెకెండ, మోసె ఇంక యేసునె గొప్ప గనమ్దిజ్ తగ్గికాన్.

4 నిజమె, విజు ఇల్కుబా, ఎయెండ్రో ఒరెన్ తొహ్నాన్. గాని విజు తొహ్నాకాన్ దేవుణునె.

5 దేవుణు కుటుమ్ది వరిజ్ విజెరిజ్, ఒరెన్ సేవమపణిమణిసి వజ మోసె నమ్మిదెజ్ తగ్గికాన్ ఆతాన్. వాని కాలమ్దు దేవుణు వెహ్తాజ్ మనికెజ్ వాండ్రు వెహ్తాన్.

6 గాని దేవుణు కుటుమ్ది వరి మున్సు అతికారం మని మరిన్ వజ, క్రిస్తు నమ్మిదెజ్ తగ్గికాన్. మాటు దయరమ్దానె నిల్లి, మాటు ఎద్రు సుడఃజిని ఆసదిజ్ డిసెంండ గటిజ అసి నె మహిజ, మాటు వన్ని కుటుమ్దికాట్.

నమ్మిఇతి వందిజ్ సారిసి సారిసి వెహ్నినిక.

7-8 అందెజె, దేవుణు ఆత్మ ఈహు వెహ్నిని లెకెండ, “నేండ్రు మీరు దేవుణు వెహ్నినిక వెహిజ, అయా దినమ్దు బీడిఃమ్ బూమిదు

దేవుణుడిజ్ లోజీదెజ్ కెఇత్తి వలె, వన్నిజ్ వరిస కితివలె, మీ మన్నుజ్ గర్త ఆతి లెకెండ్ గర్త కిమాట్.

9 అబె, నాల్పయి పంటెజ్ నాను కితి గొప్ప బమ్మ ఆతి పణిజ్ సుడఃతిజ్బా, మీ అనిగొగొర్ నజి వరిస కిజి నజి లోజీదెజ్ కెఎతార్.

10 అందెజె నాను అయా తరమ్ది లోకుర్ వెట కోపం ఆతానె వెప్తా. “ఎస్తివలెబా వరి మన్ను నా బాణిజ్ దూరం ఆజినాద్, నాను వెస్సానికెజ్ వారు వెన్ఎర్”, ఇజి.

11 అందెజె నాను నండొ కోపం ఆజి ఉండ్రీ ఒట్టు కిత, ‘వారు ఎసెజ్బా నా డగ్గు వాజి నా వెట రోమ్బెఎర్లె’,[☆] ఇజి.

12 తంబెరిజాండె, మీ లొఇ ఎయెన్ వన్నిజ్బా, బత్తిజిని దేవుణు బాణిజ్ దూరం కిబిన్ని నమకం సిలి, సెఇ మన్ను మన్ఎండ జాగర్త సుడఃదు.

13 గాని, విజు దినమ్కాజ్ మీరు ఒరెన్ మరి ఒరెన్ వన్నిజ్ బుద్ది వెప్పి, ఆదరిసి మండ్రెజ్ వలె. ‘నేండ్రు’ ఇజి వెప్పి దినం విజు, అయాలెకెండ్ కిజి మండ్రెజ్ వలె. ఎందనిజ్ ఇహిజ, మీ లొఇ ఎయెన్బా పాపమ్దాన్ మొసెం ఆజి, మన్ను గటి ఆవండ మంజిని వందిజ్ ఆదరిసి మండ్రెజ్ వలె.

14 మాటు, క్రీస్తుజ్ తొలిత నమకం ఇట్టివలె వన్నిజ్ నమ్మిత్తి లెకెండ్, ఆకర్దాక డటం నమకమ్దాన్ మహిజనె, మాటు క్రీస్తు వెట జత కూడితి మనికాట్.

15 దేవుణు మాటదు ముజాలె వెప్పిని లెకెండ్, “నేండ్రు, మీరు దేవుణు వెప్పినిక వెహిజ, దేవుణుడిజ్ లోజీదెజ్ కెఇత్తి వలె మీ మన్ను గర్త ఆతిలెకెండ్ గర్త కిమాట్”[☆].

16 దేవుణు వెప్పినిక వెంజి, వన్నిజ్ లోజీదెజ్ కెఇతికార్ ఎయెర్? ఎయెర్ ఇహిజ, అయ్గుప్తు దేసెమ్దాన్ మోసె డిస్సిసి, నడిపిసి తతి లోకుర్ విజెరె గదె.

17 ఎయెర్ వెట దేవుణు నలపయ్ పంటెజ్ కోపం దాన్మహాన్? పాపం కిజి, బీడిఃమ్ బూమిదు సాతి వరివెట గదె కోపమ్దాన్ మహాన్.

☆ 3:11 3:11 క్రిస్తస 95:7-11. ☆ 3:15 3:15 క్రిస్తస 95:7,8.

18 “వారు ఎసెజ్బా నా డగ్రు వాజి నా వెట రోమ్బెఎర్లె”, ఇజి దేవుణు ప్రమానం కితివలె ఎయెర్ వందిజ్ వెహ్లాన్? వాండ్రు వెహ్లాకెజ్ వెన్ఇతి వరి వందిజ్ గదె వెహ్లాన్.

19 అందెజె, వారు నమ్మిఇతిజ్నె, దేవుణు డగ్రు సొన్ని రోమ్బిదెజ్ అట్ఎతార్ ఇజి మాటు నెస్సాట్.

4

దేవుణు లోకురిజ్ రోమ్బిదెజ్ సిత మనాన్

1 దేవుణు డగ్రు సొన్ని వన్ని వెట రోమ్బిదెజ్ అట్నార్లె ఇజి వాండ్రు కితి ఒట్టు ఏలుబా మనాద్. అందెజె, మీ లోఇ ఎయెస్ వన్నిజ్బా అయా ఒట్టు కితిక తప్పి సొన్ఎండ మండ్రెజ్, మాటు జాగర్త మంజినాట్.

2 ఎందనిజ్ ఇహిజ, బీడిఃమ్ బూమిదు నడిఃతికార్ వెహిలెకెండ్నె మాటుబా సువార్త వెహ మనాట్. గాని వారు వెహి మని దేవుణు మాట, వరిజ్ ఎందనిజ్ పణిదిజ్ రెఎతాద్. ఎందనిజ్ ఇహిజ, వారు అయా మాట నమ్మిఎతార్.

3 ఏలు అయాక నమ్మిత్తి మాటు, దేవుణు డగ్రు సొన్ని వన్నివెట రోమ్బిజినాట్. యాక, వాండ్రు వెహ్లా లెకెండ్నె మనాద్. “అందెజె, నాను నండొ కోప ఆజి ఉండ్రీ ప్రమానం కిత. ‘వారు ఎసెజ్బా నా డగ్రు వాజి రోమ్బెఎర్లె”, ఇజి. దేవుణు లోకం తయార్ కితి వలెహన్ అసి, వన్ని డగ్రు సొన్ని మాటు వన్నివెట రోమ్బిదెజ్ వాండ్రు మా వందిజ్ తయార్ కితండ్రె మనాన్. గాని వాండ్రు ఆహె వెహ్లాన్.

4 ఎందనిజ్ ఇహిజ, దేవుణు మాటదు ఎంబెనొ ఏడు దినం వందిజ్ వెహ్లానాద్. “దేవుణు విజు పణిజ్ పూర్తి కితండ్రె, ఏడు దినమ్దు రొంబితాన్”, ఇజి.

5 మరి, ముజాలె వెహ్లాని మాటదు వెహ్లానాద్, “వారు ఎసెజ్బా నా డగ్రు వాజి రోమ్బెఎర్లె”, ☆ ఇజి.

6 ముజాలె సువార్త వెహి మనికార్, దేవుణు డగ్రు సొన్ని వన్నివెట రోమ్బెవర్లె. ఎందనిజ్ ఇహిజ, వారు నమ్మిఎత్తార్. గాని, దేవుణు డగ్రు సొన్ని వన్ని వెట రోమ్బెజ్ మహి సెగొండార్ మనార్.

7 అందెజె, దేవుణు, వన్ని డగ్రు సొన్ని వన్ని వెట రోమ్బెదెజ్ మరి ఉండ్రె రోజు ఇట్టాండ్రె, 'నేండ్రు', ఇజి కూక్తాన్, దిన్ని వందిజ్, నండొ కాలం వెనుక దావీదు వెట వెహిపిస్తా వలె, ముజాలె వెప్తి అయా మాటనె వెహిపిస్తాన్. "నేండ్రు మీరు దేవుణు వెహిసానిక వెహిజ, మీ మన్ను గర్త కిమాట్",☆ ఇజి.

8 దేవుణు డగ్రు సొన్ని వన్నివెట రోమ్బెదెజ్, యెహొసువ వరిజ్ నడిఃపిసి మంజిని కిహిజ, మరి ఉండ్రె రోమ్బెని దినం వందిజ్ దేవుణు వెనుక వెహిఎండ మహాన్ మరి.

9 అందెజె దేవుణు ఏడు దినమదు రోమ్బెతిలెకెండ, లోకుర్బా రోమ్బెదెజ్ ఇజి వాండ్రు సిత మనాన్.

10 ఎందనిజ్ ఇహిజ, దేవుణు డగ్రు సొన్సి వన్ని వెట రోమ్బెని ఎయెన్బా, దేవుణు వన్ని పణిజ్ వీస్తాండ్రె రోమ్బెతి లెకెండ, వాండ్రుబా వన్ని పణిజ్ వీస్తాండ్రె రోమ్బెజినాన్.

11 అందెజె, దేవుణు డగ్రు సొన్ని వన్నివెట రోమ్బెదెజ్ మాటు నండొ క్లబ్బబడిజినాట్. ఎందనిజ్ ఇహిజ, ఇస్తాయెలు లోకుర్ దేవుణుదిజ్ లోజిఎండ అర్తిలెకెండ ఎయెన్బా అర్ఎండ మండ్రెజ్.

12 ఎందనిజ్ ఇహిజ, దేవుణు మాట పాణం మనిక. నండొ సత్తు మనిక. రుండి దరోట్ తెవుగు మని ఎలాగ మర్తి కుర్లదిజ్ ఇంక ఒదె తెవుగు మనిక. దేవుణు మాట, లోఇ డుగ్జి మన్నుదిజ్ గర్బుమదిజ్ ఎర్లిసి డూగ్గు సొనాద్. అత్కుజ, ముల్వెజి ఎర్లిసినాద్. ఆలోసనమ్కాజ్, మన్నుదు మని ఉదెసమ్కాజ్ పరిక్కు కినాద్.

13 తయార్ ఆతి ఇనికబా దేవుణు బాణిజ్ డవ ఆదెజ్ అట్ఉ. విజు వన్ని కణకెజి ఎర్దు టెటాజ్ తోర్జిని, డాజ్ఎండ తోర్జిని వన్నిజె, మాటు కితి విజు వన్నా వందిజ్ లెక ఒపజెప్తెజ్ మనాద్.

యేసునె విజు పుజెరిజి మున్ను గొప్ప పెరి పుజెరి.

14 అందెజె, మాటు డటం వెహ్నిని నమకం డిస్ఎండ అసి మంజినాట్. ఎందనిజ్ ఇహిజ, ఆగాసం డాట్టి, దేవుణు డగ్గు సోహి విజెరె పుజెరిజ ముస్సు మని పెరి పుజెరి ఒరెన్ మజి మనాన్. వాండ్రు దేవుణు మరిసి ఆతి యేసు.

15 మా విజెరె పుజెరిజ ముస్సు మని పెరి పుజెరి, మజి మని తకుజ విజు నెన్ఇకాన్ అఎన్. గాని మజి వాజిని విజు రకమ్కాణి పరిసెజ్, వన్నిజ్బా వాతె. గాని వాండ్రు పాపం కిఎతాన్.

16 అందెజె నండొ దయా దర్మం తోరిసిని దేవుణు బన్ని సిమసనం డగ్గు మాటు తియెల్ సిల్లెండ దయేరమ్దాన్ సొనాట్. అబె వన్ని కనికారం మజి దొహ్నాద్. మజి అవసరం మనివలె మజి సాయం కిదెజ్ వన్ని దయా దర్మం దొహ్నాద్.

5

1 విజెరె పుజెరిజ ముస్సు మని పెరి పుజెరిజబా వరి లోకుర్ నడిమిహనె దేవుణు ఎరలిస్తాండ్రె, లోకుర్ వందిజ్ దేవుణుదిజ్ సేవ కిదెజ్, వాండ్రు ఏర్పాటు కినాన్. ఎందనిజ్ ఇహిజ, వారు లోకురి దేవుణుదిజ్ సీదెజ్.

2 విజెరె పుజెరిజ ముస్సు మని పెరి పూజెరి, నెన్ఎండ తపు కినివరిజ్, సరి తప్పి సొని వరిజ్ సార్లి తోరిస్తెజ్ అట్నాన్. ఎందనిజ్ ఇహిజ, వరిజ్ మని తకుజ్ విన్నిజ్బా మన్నె.

3 దిన్ని వందిజె, లోకురి పాపమ్క వందిజె ఆవండ, వన్ని సొంత పాపమ్క వందిజ్బా, వాండ్రు పూజెజ్ సీదెజ్ మనాద్.

4 యెన్బా వన్నిజ్ వాండ్రె, విజు పుజెరిజ ముస్సు మని పెరి పూజెరి ఇని పెరి గనం తపె అఎన్. అహరోనుజ్ విజెరె పుజెరిజ ముస్సు మని పెరి పూజెరి ఇజి దేవుణు ఏర్పాటు కితి లెకెండ, దేవుణునె వన్నిజ్ ఏర్పాటు కిదెజ్ వలె.

5 అయాలెకెండ, క్రిస్తుబా వన్నిజ్ వాండ్రె విజెరె పుజెరిజ ముస్సు మని పెరి పుజెరి ఇని యా పెరి గనం తపె అతాన్. గాని విజెరె పుజెరిజ ముస్సు మని పెరి పుజెరి ఇజి వన్నిజ్ ఏర్పాటు కితి దేవుణు వన్నిజ్ వెహ్నాన్. “నీను నా మరిన్. నేండ్రు నాను నీ బుబ్బు ఆత మన”, ఇజి.

6 మరి, ఎంబెనోబా దేవుణు వెహ్సినాన్, “మెల్కిసెదెక్ మహి లెకెండ, నీను ఎల్లకాలం మని ఒరెన్ పుజెరి”, ఇజి.

7 యేసు బూమిదు మహివలె, వన్నిజ్ సావుదాన్ తపిస్తెజ్ అట్టి దేవుణుదిజ్ డటం అడఃబాజి, కణెర్ వాక్సి పార్దనం కిత్తాన్. వన్ని మొరొ దేవుణు వెహ్ ఎందనిజ్ ఇహిజ వాండ్రు తియెల్దాన్ తగె ఆత మహాన్.

8 వాండ్రు దేవుణు మరిసి ఆతిజ్బా, వన్నిజ్ వాతి స్రమెజాణిజ్ దేవుణుదిజ్ లోజిదెజ్ వాండ్రు నెస్తాన్.

9 దేవుణు వన్నిజ్ పూర్తి కితివలె, వన్నిజ్ లోజిని వరిజ్ విజెరిజ్ రక్సిన్సికాన్ ఆతాన్.

10 మెల్కిసెదెక్ మహి లెకెండ, విజెరి పుజెరిజ ముస్కు మని పెరి పుజెరి ఇజి దేవుణు వన్నిజ్ ఏర్పాటు కిత్తాన్.

నమకమ్దాన్ అర్ఎండ జాగర్త సుడ్డెదెజ్.

11 దిన్ని వందిజ్ మరి నండొ వెహ్తెజ్ మజి మన్నె గాని, మీరు నిపాతినె అర్దం కిజినిదెర్. అందెజె నండొ వెహ్తెజ్ కష్టం ఆజినాద్.

12 మీరు దేవుణుదిజ్ నమ్మిజి నండొ పంటెజ్ ఆజినాద్. ఏలు మహి వరిజ్ బోదిస్తెజ్ మనికిదెరె మీరు. గాని, దేవుణు మాటదు తొలిత నెస్తెజ్ మని నిజమాతి సజతిజ్ మరిబా నెస్పిస్తెజ్ ఎయెన్బా నెస్పిస్తాన్ మండ్రెజ్ వలె. పాలు ఉణిజిని లేత కొడొర్ లెకెండ మీరు మనిదెర్. బోజనం ఉండెజ్ అట్ఇకిదెర్.

13 పాలు ఉణికాన్ ఎయెన్బా లేత కొడొనె. నిజమాతికెజ్ ఇనికెజ్ ఇజి నెస్పిసిని బోద నెస్పెన్.

14 గాని పెరి వరిజె బోజనం మనాద్. నెగ్గికెజ్, సెఇకెజ్ తేడ నెసి, నెగ్గికెజ్ కిదెజ్ నెస్తిమనికారె వారు.

6

1 అందెజె, క్రిస్తు వందిజ్ తొలిత నెస్తి మహి బోదెజె నెసినె మన్ఇండ, మరి పెరి మాటెజ్బా నెసి పిరినాట్. సావుదు నడిపిసిని సెఇ పణిజ్ ఒప్పుకొడిఃజి డిసి సిజి, దేవుణు ముస్కు నమకం ఇడ్డెదెజ్ ఇజి మరి మరి వెహ్సినె మన్మాట్.

2 బాప్తిసం లాగె ఆని దని వందిజ్, కికు ఇడ్ని దని వందిజ్, లోకుర్ సావుదాన్ మర్జి నిజ్ని దని వందిజ్, ఆకార్దు దేవుణు సీని లిర్పు వందిజ్ మరి మరి వెహ్నినె మన్మాట్.

3 దేవుణుదిజ్ ఇస్టం ఇహిజ, మరి లావు నెసి పిరినాట్.

4-6 ఉండ్రీ కాలమ్దు దేవుణు జాయ్దు మహికార్, పరలోకమ్ది ఇనాయం వందిజ్ బాగ నెస్తి మనికార్, దేవుణు ఆత్మ వెట కూడితికార్, దేవుణు మాట నెగ్గక ఇజి నెస్తికార్ క్రీస్తు మర్జి వానివలె నమ్మిత్తి లోకురిజ్ నస్తివలె మంజిని పెరి సత్తు వందిజ్ నెస్తికార్, వారు దేవుణు బాణిజ్ దూరం ఆతిజ, మరి పాపమ్కు ఒప్పుకొడిజిని వరిజ్ మర్జి తతెజ్ అట్ఎద్. ఎందనిజ్ ఇహిజ, వారు దేవుణు మరిసిజ్ మరి ఉండ్రీ సుటుబా సిలువాదు కుటిజాణిజ్ డెయ్జి, విజెరె ఎద్రు సిగు కిబిస్సార్.

7 నిన్ని వరిజ్ పణిదిజ్ రెఇ బూమిదిజ్, పోలిస్తెజ్ ఆనాద్. ఎందనిజ్ ఇహిజ, ఎనెజ్ ఎనెజ్ అర్సిని పిరుదాన్ ఊడ్ని బూమిదు, పంట పండిసిని వన్నిజ్ పణిదిజ్ వానిలెకెండ్ బూమి పంట పండిసి సీనాద్. అయా బూమిదిజ్ దేవుణు దీవిస్సాన్.

8 గాని లటెజ్ సాప్పుజ్ పండిసిని బూమి పణిదిజ్ రెఎద్. దేవుణు దనిజ్ తప్ఎండ సాయిపు సీనాన్ కడెవేరిదు సిసుదాన్ నాననం మనాద్.

9 గాని తంబెరిజాండె, మాపు యా లెకెండ్ వెహ్నిజ్బా, మీరు అయాలెకెండ్ ఆఇదెర్, ఇజి మాపు పూర్తి నమ్మిజినాప్. క్రీస్తు మున్కు నమకం ఇడ్జి రక్సణదు వాతి లోకుర్ కిని నెగ్గి పణిజ్, మీరుబా కిజినిదెర్ ఇజి మాపు పూర్తి నెసినాప్.

10 దేవుణు అనెయం కినికాన్ ఆఎన్. మీరు వన్ని వందిజ్ కితి పణిజ్, వన్ని లోకురిజ్ సాయం కిజి, మరి మరి సాయం కిజి వన్నిజ్ తోరిసిని ప్రేమ వాండ్రు పోన్ఎన్.

11 మీ లొఇ విజిదెరిబా, యా లెకెండ్ కడెవేరిదాక మండ్రెజ్ ఇజి మాపు ఆస ఆజినాప్. ఎందనిజ్ ఇహిజ, మీరు ఆస ఆజినికెజ్ విజు తప్ఎండ పూర్తి ఆదెజ్

12 మీరు బండెజ్ ఆదెజ్ ఇజి మాపు కోరిఎప్. గాని దేవుణు మున్ను-
మని నమ్మకమ్దాన్, కష్టమ్కు ఓరిసినిదనితాన్ దేవుణు సీన ఇజి
ఒట్టు కితికెజ్ దొహ్క్కి వరిలెకెండ మీరు ఆదెజ్ ఇజి కోరిజినాప్.

దేవుణు అబ్రాహముజ్ కితి ఒట్టు

13 దేవుణు అబ్రాహముజ్ నెగ్గికెజ్ కిన ఇజి ఒట్టు కిత్తాన్. కితివలె
వన్ని మున్ను ఎయెన్బా పెరికాన్ సిలితిజ్, వాండ్రు వన్నిజె, తోడుః
ఇడ్డెః ఆజి అబ్రాహముజ్ ఒట్టు కిత్తాన్.

14 వాండ్రు వెహ్తాన్, “నాను నిజి తపెఎండ దీవిసి, నిజి నండొ తెగ్గది
వరిజ్ సీన”, ☆ ఇజి.

15 అబ్రాహము ఓరిసి కాప్ కిజి మహాన్. అందెజె దేవుణు సీన ఇజి
ఒట్టు కితిక వన్నిజ్ దొహ్క్తాద్.

16 లోకుర్ ఒట్టు కినివలె వరిజ్ ఇంక పెరి వరిజ్, వాండ్రె నజి తోడుః
ఇజి వెహ్సొ ఒట్టు కిసార్. వరి నడిఃమి మని గొడుఃబెజ్ విజు ఉండ్రె
ఒట్టుదాన్ సారలి ఆనె.

17 దేవుణు, వాండ్రు ఒట్టు కితిక దొహ్క్తెజ్ అక్కు మని వరిజ్, వన్ని
ఉదెసం వాండ్రు కండెక్బా మారిన్ఎన్, ఇజి వరిజ్ టెటాజ్ నెస్పిసిని
వందిజ్, వాండ్రు వన్నిజె తోడుః ఇడ్డెః ఆజి ఒట్టు కిత్తాన్.

18 అందెజె దేవుణు మజి వన్ని ఒట్టు సిత మనాన్. వన్నిజె తోడుః
ఇడ్డెః ఆజి సిత మనాన్. యా రుండి సజలిజ్ మార్ఉ. ఎందనిజ్
ఇహిజ, దేవుణు అబద్దం వర్గిదెజ్ అట్ఎన్. అందెజె, దేవుణునె నా
గతి ఇజి నమకం ఇడ్డి మజి, మా ఎద్రు ఇడ్డి మని ఆసదిజ్ డిఃన్ఎండ
అస్తెజ్ దయరం మంజినాద్.

19 మా పాణం ఇతల్ అతాల్ కద్లిఎండ, నెగెండ నిల్తెజ్ యా ఎద్రు
సూణి ఆసనె ఉండ్రె కన్నె లెకెండ మనాద్. తెర వెన్కా మని దేవుణు
వందిజ్ ఒదె కేట ఆతి గదిదు అయాక ఒనాద్.

20 యేసు మా వందిజ్ మజి ఇంక ముజాలె అబె సొహాన్. మెల్కిసెదెకు మహివజ, వాండ్రు ఎలాకాలం ఒరెన్ విజెరి పుజెరిజ మున్సు మని పెరి పుజెరి ఆత మనాన్.

7

పుజెరి ఆతి మెల్కిసెదెకు

¹ యా మెల్కిసెదెక్ సాలెం పట్టుమ్ది రాజు. విజు దని మున్సు ఆతికారం మని దేవుణు పుజెరి. నండొ రాజురి మున్సు విదెం కిజి గెలసి, అబ్రాహము వన్ని ఇండ్రొ మర్జి వాజి మహివలె, మెల్కిసెదెక్ వన్నిజ్ దసూల్ ఆతండ్రె, దీవిస్తాన్.

² అయావలె అబ్రాహము, వాండ్రు ఉద్దం కిజి గెలసి దొహ్క్తి విజు వన్యాజ్ లొఇ మెల్కిసెదెకుజ్ దసంబాగం సితాన్. వన్ని పేరు తొలిత అర్దం ఇనిక ఇహిజ, నీతి నిజాయితదాన్ ఏలుబడిః కిని రాజు. మరి ఉండ్రొ అర్దం ఇనిక ఇహిజ సమాదనమ్దాన్ ఏలుబడిః కిని రాజు ఇజి. ఎందనిజ్ ఇహిజ, వాండ్రు సాలెం పట్టుమ్ది రాజు. సాలెం ఇహిజ సమాదనం.

³ వన్ని అయ్సి అప్పొసి వందిజ్నో, వన్ని అనిగొగొర్ వందెజ్నో గుర్తు ఇనికెజ్ సిలు. వన్ని పుడుగు వందిజ్నో, పావు వందిజ్నో తెలిఎద్. వాండ్రు దేవుణు మరిసి లెకెండ్ ఎల్లకాలం ఒరెన్ పుజెరి.

⁴ యా మెల్కిసెదెకు ఎసా పెరికాన్ ఇజి ఎత్తు కిదు. దేవుణు ఏర్పాటు కితి లోకుర్ లొఇ గొప్ప పెరి అనిగొగొ ఆతి అబ్రాహము, విదెమ్దు గెలసి వన్నిజ్ దొహ్క్తి విజు వన్యాజ్ లొఇ వన్నిజ్ దసంబాగం సితాన్.

⁵ మోసె సితి రూలు వజ, లేవి తెగ్గదు పుట్టి పుజెరిజు ఆతికార్, ఇస్రాయేలు లోకుర్ బాణిజ్ దసంబాగం లొసినార్. ఇహిజ వారు వరి సొంత లోకుర్ బాణిజ్ లొసినార్. యా పుజెరిజుబా, అబ్రాహము తెగ్గదు పుట్టికార్ ఆతిజ్బా వరి సొంత లోకుర్ బాణిజ్ దసంబాగం లొసినార్.

6 మెల్కిసెదెకు లేవి తెగ్గదు పుట్టికాన్ ఆవెన్. గాని వాండ్రు అబ్రాహము బాణిజ్ దసంబాగం లొస్తాండ్రె, దేవుణు సితి ఒట్టుజ్ మని అబ్రాహముజ్, దీవిస్తాన్.

7 దీవిస్సికాండ్రె, దీవన లొసె ఆని వన్నిజ్ ఇంక పెరికాన్ ఇని మాట అనుమానం సిలికాదె.

8 యూదురి పుజెరిజు సుడఁతిజు, సాజిసానికారె దసంబాగం లొసికాన్. గాని మెల్కిసెదెకుజ్ సుడఁతిజు, దసంబాగం లొసె ఆనికాన్ బత్తిజినాన్ ఇజినె దేవుణు మాట వెప్పినాద్.

9 అహిజు, దసంబాగం లొసిని లేవి తెగ్గదు పుట్టికార్, మెల్కిసెదెకుజ్ దసంబాగం సితార్. వరి అనిగొగొ ఆతి అబ్రాహము సిలిదనితాన్ వారు సితార్ ఇజి ఒరెన్ వన్నిజ్ వెహ్తాజ్బా ఆనాద్.

10 ఎందనిజ్ ఇహిజు, మెల్కిసెదెకు అబ్రాహముజ్ సుడఁతివలె, లేవి పుట్టెండ్రె. వాండ్రు అబ్రాహము పొటాద్నె నస్తివలె మహాన్.

మెల్కిసెదెకు లెకెండ్ యేసు ఒరెన్ పుజెరి

11 దేవుణు మెసె వెట మజి రూలుజ్ సిత మనాన్. అయా రూలుజ్ వజు, లేవి తెగ్గదు పుట్టికార్ పుజెరిజు ఆదెజ్వలె. ఏలు, లేవి తెగ్గదు మని పుజెరిజు ఇహిజు ఆరోను కుటుమ్దికార్ దేవుణు ఎత్తు కితి ఉపదేసమ్కు పూర్తి కిదెజ్ అట్టార్ ఇహిజు, మరి ఒరెన్ పుజెరి వాదెజ్ అవ్సరం సిలెతాద్ మరి. అహారోను కుటుమ్దు మనికాన్ ఆవండ, మెల్కిసెదెకు మహి లెకెండ్ ఒరెన్ వన్నిజ్ పొక్తెజ్ అవ్సరం సిల్లెద్.

12 పుజెరిజు యా లెకెండ్ మారితిజు, మోసె సితి రూలుజ్బా మార్దెజ్ వలె.

13 ఎయె వందిజ్ మాటు వెప్పినాటొ, వాండ్రు మరి ఉండ్రె తెగ్గదు మనికాన్. అయా తెగ్గదు మనికార్ ఎయెర్బా పుజెరి వజు, మాలి పీటదు ముజాలె సేవ పణి కిఎర్. యా సజతిజ్, మా ప్రబు వందిజె వెహ్తా మన్నె.

14 వాండ్రు యూద తెగ్గదు పుట్టికాండ్రె ఇజి టెటాజ్ నెసినాట్. పుజెరిజు వందిజ్ మోసె వెహ్తావలె, యూద తెగ్గ వందిజ్ ఇనికబా వెహ్తాన్.

15 మెల్కిసెదెకు పుజెరి మహివజ, మరి ఒరెన్ పుజెరి వాత మనాన్. అందెజె, మాటు వెహ్తాక మరి ఒదె టెటాజ్ అర్థం ఆజినాద్.

16 లేవి తెగ్గదు మనికాండ్రె పుజెరి ఆదెజ్ ఇని రూలు వాండ్రు పూర్తి కిఎండ పుజెరి ఆతాన్. గాని నాసనం కిదెజ్ అట్ఇ, బత్మిజిని సత్తుదాన్ నె పుజెరి ఆతాన్.

17 ఎందనిజ్ ఇహిజ “మెల్కిసెదెకు మని లెకెండ్, నీను ఎలాకాలం ఒరెన్ పుజెరి”, ☆ ఇజి దేవుణు మాటు క్రీస్తు వందిజ్ వెహ్సినాద్.

18 అందెజె, పుజెరిజ వందిజ్ మని పడాఁయి రూలుదిజ్ ఏలువ సిల్లెద్. ఎందనిజ్ ఇహిజ దనిజ్ సత్తు సిల్లెతాద్. పణిదిజ్ రఎతాద్.

19 ఎందనిజ్ ఇహిజ, మోసె సితి రూలుజ్, ఇని దనిజ్ బా పూర్తి కిఉతె. ఏలు మాటు ఎద్రు సుడఁతిక మోసె సితి రూలుజ్ కితి ఒటుదిజ్ ఇంక నెగెద్. అయా ఒట్టుదాన్ దేవుణు డగ్రు సొండ్రెజ్ అట్నాట్.

20 క్రీస్తు ఎలాకాలం మని ఒరెన్ పుజెరి ఇజి దేవుణు ఒట్టు కిత్తాన్. గాని మరి ఎమేణి పుజెరిజ బా దేవుణు యా లెకెండ్ ఒట్టు కిఎతాన్.

21 దేవుణు యేసుజ్ నె వెహ్సాన్, “ప్రబు ఉండ్రీ ప్రమాణం కిత మనాన్. అయాక ఎసెజ్ బా తప్ఎన్. “నీను ఎలాకాలం మని ఒరెన్ పుజెరి’☆”, ఇజి.

22 దేవుణు యా లెకెండ్ ఒట్టు కతాన్. అందెజె, యాక ఉండ్రీ నెగ్గి ఒపుమానం ఇజి తప్ఎండ నిజం కినికాన్ యేసునె.

23 పడాఁయి అలవాటు వజ నండొండార్ పుజెరిజు మహార్. ఒరెన్ సాతిజ, మరి ఒరెన్ వన్ని పణి కినాన్.

24 గాని యేసు ఎలాకాలం మని ఒరెన్ పుజెరి. ఎందనిజ్ ఇహిజ, వాండ్రు ఎలాకాలం బత్మిజినాన్.

25 అందెజె వాండ్రు, ఏలు మరి ఎలాకాలం వన్ని వెట దేవుణు డగ్రు సొని వరిజ్ రక్సిస్తెజ్ వాండ్రు అట్నాన్. ఎందనిజ్ ఇహిజ, వరి వందిజ్ దేవుణుదిజ్ బతిమాల్దెజ్ వాండ్రు ఎల్లకాలం బత్మిజినాన్.

26 అందెజె, మా అవ్సరమ్కు తిరిసిని విజా పుజెరిజ ముస్సు మని పెరి పుజెరి యేసునె. వాండ్రు ఇని పాపం సిలికాన్, నింద సిలికాన్,

ఇని తవు సిలికాన్, పాపం కిని వరిబాణిజ్ కేట ఆతికాన్. వన్నిజె పరలోకమ్దు గొప్పు పెరి గవరం సిత మనాన్.

²⁷ మహి పెరి పుజెరిబు లెకెండ, వాండ్రు రోజు పూజెజ్ సీదెజ్ అవసరం సిల్లెద్. ముజాలె వన్ని పాపమ్క వందిజ్, వెనుక లోకురి పాపమ్క వందిజ్ పూజెజ్ సీదెజ్ అవసరం సిల్లెద్. వన్నిజ్ వాండ్రె సిలువాదు ఒపజెప్తి వలె, వరి పాపమ్క వందిజ్, ఎలాకాలం వందిజ్ ఉండ్రె సుటు పూజ సితాన్.

²⁸ మోసె సీతి రూలు వజ ఏర్పాటు ఆతి విజెరె పుజెరిబు మున్సు. మని పెరి పుజెరిబు పూర్తి ఆకకార్. గాని మోసె సీతి రూలుజ్ వెనుక, దేవుణు ఒట్టు కిత్తాన్. అయా ఒట్టు వజ మరిసి విజెరె పుజెరిబు మున్సు. మని పెరి పుజెరి ఇజి ఏర్పాటు ఆతాన్. దేవుణు వన్నిజ్ ఎలాకాలం పూర్తి ఆతికాన్ కిత్తాన్.

8

యేసునె పుజెరిబు మున్సు మన్ని మా పెరి పుజెరి.

¹ మాపు వెప్పిని సజతిజ లొఇ ముకెలమాతి మాట యాకదె. అయాక ఇనిక ఇవెహిజ పరలోకమ్దు గొప్పు పెరి దేవుణు బసిని సమాసనం ఉణెర్ పడఃకాదు, గొప్పు బస్తమని ఒరెన్ విజెరె పుజెరిబు మున్సు. మని పెరి పుజెరి మజి మనాన్.

² వాండ్రు దేవుణు వందిజ్ ఒదె కేట కితి గదిదు విజు పుజెరిబు మున్సు. మని పెరి పుజెరి వజ సేవ కిజినాన్. ఇహిజ, ప్రబునె తయార్ కిజి ఇడ్డి నిజమాతి గుడారమ్దు సేవ కిజినాన్. లోకుర్ తయార్ కితి గుడారమ్దు ఆవద్ సేవ కిజినిక.

³ విజెరె పుజెరిబు మున్సు. మని పెరి పుజెరిబుబా, నండొ రకమ్కాణి పూజెజ్ దేవుణుదిజ్ సీదెజ్ ఏర్పాటు ఆత మనార్. అందెజె, విజెరె పుజెరిబు మున్సు. మని యా పెరి పుజెరిబా ఇనికబా ఉండ్రె పూజ సీదెజ్ వలె.

⁴ వాండ్రు యా లోకమ్దునె మంజినిక ఇహిజ వాండ్రు ఒరెన్ పుజెరిబా ఆతాన్మరి. ఎందనిజ్ ఇహిజ, మోసె సీతి రూలుజ్ వజ పూజెజ్ సీని నండొ పుజెరిబు మనార్.

5 వారు సేవ కిజిని గుడారం, పరలోకమ్దు మని నిజమాతి గుడారమ్ది ఉండ్రీ రూపునె, నీడఃనె. నని బానె వారు సేవ కిజినార్. అందెజె, మోసె గుడారం తయార్ కిదెజ్ మొదొల్స్తవలె దేవుణు డటం వెహ్లాన్, “నిజి గొరొతు తొరిస్తీ రూపు వజనె విజు తయార్ కిదెజ్ జాగ్రత సుడొదెజ్వలె”, ఇజి.

6 గాని ఏలు, దేవుణుదిజ్ లోకుర్ నడిఃమి యేసు ఏర్పాటు కితి ఒపుమానమ్నె గొప్ప నెగ్గిక. అయాలెకెండె, మహి పుజెరిజ పణి ఇంక, యేసుజ్ దొహ్క్తి మని పుజెరి పణినె గొప్ప నెగ్గిక. ఎందనిజ్ ఇహిజ, నెగ్గి నజతిజ్ సీన ఇజి కితి ఒటుదిజ్ ఆదారం ఇడొజినె యేసు అయా ఒపుమానం ఏర్పాటు కిత్తాన్.

7 మొదొహి ఒపుమానం, ఇని తపు సిలిక ఆనిక ఇహిజ, మరి ఉండ్రీ ఒపుమానమ్దిజ్ అవ్నరం సిల్లెతాద్మరి.

8 గాని దేవుణు, లోకుర్ లొఇ తపు సుడొతండ్రె, వరి తప్పుజ తొరిసి, వరిజ్ ఈహు వెహ్లాన్, “ప్రబు వెహ్లానాన్, ‘ఇస్రాయేలు లోకుర్ వెట, యూద తెగ్గాది వరి వెట నాను ఉండ్రీ కొత్త ఒపుమానం కిని కాలం వాజినాద్.

9 నాను వరి అనిసిరిజ్ అయ్గుప్తు దేసెమ్దాన్ వరి కియు అసి వెల్లి నడిఃపిస్తీవలె వరివెట కితి ఒపుమానం లెకెండ్ర్ ఆవిద్ యా ఒపుమానం. నాను వరివెట కితి ఒపుమానం వారు తప్తార్. అందెజె, నాను వరిజ్ డిస్త సిత”, ఇజి ప్రబు వెహ్లానాన్.

10 మరి ప్రబు వెహ్లానాన్, ఇస్రాయేలు లోకుర్ వెట నాను కిని ఒపుమానం యాకదె. వాని దినమ్కాజ్ వెనుక, నాను నా రూలుజ్ వరి గబమ్దు ఇడ్లు. నాను వరి మన్నుదు అయాకెజ్ రాన్ను. నాను వరి దేవుణు ఆన. వారు నా లోకుర్ ఆనార్.

11 ఎయెర్బా వరి పడొకది వరిజొ, వరి సొంత ఇండ్రొణి వరిజొ, ‘మీరు ప్రబుజ్ నెస్తు, ఇజి నెన్పిన్ఎర్. ఎందనిజ్ ఇహిజ, వారు విజెరి నజి నెస్సార్. ఇజివరి బాణిజ్ మొదొల్సి, పెరివరిదాక నజి నెస్సార్.

12 నాను, వారు కితి సెఇకెజ్ సెమిన్ను. వరి పాపమ్కు నాను ఎసెజ్బా ఎత్తు కిఎ’,☆ ఇజి.

13 యా ఒప్పుమానమ్దిజ్, 'కొత్తక' ఇజి దేవుణు వెహ్ని, మొదొహి ఒప్పుమానమ్దిజ్ పడాయ్క కిత్తాన్. పణిదిజ్ రణ పడాయ్ ఒప్పుమానం బేగినె సిల్లెండ ఆనాద్.

9

కొత్త ఒప్పుమానమ్ది విజేరె పుజేరిజ ముస్సు మన్ని పెరి పుజేరి

1 దేవుణుని వన్ని లోకుర్ నడిమి మహి మొదొహి ఒప్పుమానమ్దు, దేవుణుదిజ్ పొగ్డిజి మాడిసిని వందిజ్ రూలుజ్ మహె. యా బూమిదు దేవుణుదిజ్ పొగ్డిజి మాడిస్తెజ్ ఉండ్రి గూడారమ్బా మహాద్.

2 ఉండ్రి గూడారం తయార్ కిత మనాద్. దన్నిజ్ రుండి గదిజ్ మహె. మొదొహి గదిదు దీవ డండి ఉండ్రి, బల్ల ఉండ్రి, మరి దేవుణు ఎర్దు ఇడ్చి రొటెజ్ మహె. యా గదిదిజ్ దేవుణు వందిజ్ కేట అతి గది ఇనార్.

3 (యా రుండి గదిజ నడిమి అడ్డు వజ ఉండ్రి తెర మనాద్) తెర వెనుక మన్ని గదిదిజ్ దేవుణు వందిజ్ ఒడ్డె కేట అతి గది ఇనార్.

4 అబ్బె బజారమ్దాన్ తయార్ కితి దూపం సుర్ని మాలి పెటె, ఒప్పుమానం కితిక ఇడ్చిమని మందసం మన్నె. మందసమ్దిజ్, లోఇ వెల్లి సుటులం బజారం పూత రాస్త మనాద్. యా మందసం లోఇ బజారమ్దాన్ తయార్ కితి జగ్గుదు మన్న, సిగిరితిమన్ని ఆహారోసు డుడ్డుని దేవుణు మోసెజ్ సిత్తి పతి ఆడ్రెజ్ రాస్తి ఇడ్చి పల్కెజ్ మన్నె.

5 మందసం ముస్సు, దేవుణు మనాన్ ఇజి, తోరిసిని కెరూబుజ్ మన్నె. కెరూబుజ్ కరుణపీటం ముస్సు, ఇహిజ, మందసం మూత్త ముస్సు రెక్కెజ్ కోరిసయ్యె మన్నె. ఏలు యా సజతిజ్ లాపు వెహ్తెజ్ మాటు అట్ఎట్.

6 యాలెకెండ, విజా నెగ్రెండ ఇడ్చివెనుక, పుజేరిజు, మొదొహి గదిదు వరి సేవపణి కిదెజ్ ఎస్తిసన్తివలె డుగ్గనార్.

7 గాని విజేరె పుజేరిజ ముస్సు మన్ని పెరి పుజేరి ఒరెండ్రె, లోఇమన్ని గదిదు డుగ్గాన్. అయాకబా వాండ్రు ఏంటుదు ఉండ్రి సుటునె డుగ్గాన్. డుగ్గివలె నల సిల్లెండ డుగ్గివన్. అయాక

వాండ్రు వన్ని పాపమ్కాజ్ వందిజ్, నెన్వీండ లోకుర్ కితి పాపమ్కాజ్ వందిజ్ దేవుణుదిజ్ పూజ సీనాన్.

⁸ యాలెకెండ్ కిజిని అలవాటుదాన్, దేవుణు ఆత్మ టెటాజ్ నెస్సిసిని సజతి ఇనిక ఇహిజ, మొదోహి గదిని అబ్బె కిని అలవాటుజ్ విజు నిల్సి మంజినివలె, లోకుర్ దేవుణు వందిజ్ ఒదె కేట ఆతి గదిదు సొండ్రెజ్ అట్వర్.

⁹ యాక యా కాలమ్దిజ్ ఉండ్రీ గుర్తు. ఇనిక ఇహిజ, దేవుణుదిజ్ పూజ సీని విజు రకమ్కాణి పూజెజ్, సీనివన్ని గర్బమ్దు సుబ్బరం కిదెజ్ అట్ఉ.

¹⁰ యా పడాయ్ ఆసారం, తిండి వందిజ్, ఉణి దన్ని వందిజ్, రకమ్రకం సమయమ్దు నోర్బాని దన్ని వందిజె వెప్పిని రూలుజ్. యా రూలుజ్ ముస్సు కిజినికెజ్. కొత్త రూలుజ్ వాని కాలమ్దాక యా రూలుజ్ మంజినె.

¹¹ గాని, ఇబ్బె ఏలె మన్ని నెగ్గి సజతిజ్ కల్గిసిని విజేరె పుజేరిజ ముస్సు మన్ని పెరి పుజేరి ఇజి క్రిస్తు వాత మనాన్. వాండ్రు సేవ కిని గుడారం ఇహిజ పరలోకం. గొప్ప ముకెలమతిక. నండో పూర్తియాతిక. అయ్యాక లోకుర్ తయార్ కితిక ఆవిద్. తయారాతి లోకమ్దు మనిక ఆవిద్.

¹² క్రిస్తు గుడారమ్దు డుగ్గజి, ఎలాకాలం వందిజ్ ఉండ్రీ సుటు, దేవుణు వందిజ్ ఒదె కేట ఆతి గదిదు సొహివలె, పూజ సీదెజ్ ఇజి గొర్రెజ, దూడెజ నల వాండ్రు ఒవీన్. గాని, వాండ్రు వన్ని సొంత నలనె ఒతాండ్రె మజి పాపమ్కాణిజ్ సావుదాన్ ఎలాకాలం డిన్పిస్తాన్.

¹³ మోసె సిత్తి రూలుజ వజ, గొర్రెజ, కొడ్డిజ నలని దూడెజ్ సుహ్తి నీరు, మయిల* ఆతి లోకురి ఒడోల్దు వాక్కార్. ఎందనిజ్ ఇహిజ, వరి ఒడోల్ సుబ్బరం ఆజి దేవుణు వందిజ్ ఒపజెపె ఆజి కేట ఆదెజ్.

¹⁴ అహిజ, క్రిస్తు నల ఎసొ నెగ్గెండ సుబ్బరం కిసాద్ ఇజి ఎత్తు కిదు. ఎలాకాలం మన్ని ఆత్మసత్తుదాన్, క్రిస్తు మా పాపమ్కాజ్ వందిజ్ వన్నిజ్ వాండ్రె దేవుణుదిజ్ ఒపజెపె ఆతాన్. ఇని పాపం సిల్లి

* **9:13 9:13** ఇబ్బె మయిల ఇజి వెప్పినిక దేవుణుదిజ్ డగ్గు కిదెజ్ అట్ఇ సజతిజ్, సిల్లిజ దేవుణు ఎద్దు కల్లి ఆతికెజ్

పూజ లెకెండ, వన్నిజ్ వాండ్రె ఒపజెపె ఆతాన్. సావు తపిన్ని నెజ పణిజాణిజ్ వన్ని నల మా గర్భం మజి గదిన్ ఏండలెకెండ సుబ్బరం కినాద్. ఎందనిజ్ ఇహిజ బత్కిజిని దేవుణుదిజ్ మాటు పొగడిజి మాడిస్తెజ్.

15 అందెజె క్రీస్తునె అయా కొత్త ఒపుమానం నడిపిన్నికాన్. ఎందనిజ్ ఇహిజ, దేవుణు కూక్తి లోకురిజ్ దేవుణు సీన ఇజి ఒట్టు కితి ఎలాకాలం మంజిని దీవెనమ్మకు దొహ్కెజ్. మొదొల్ కితి ఒపుమానమ్మదిజ్ అడిగి మహివలె, వారు కితి తప్పుజాణిజ్ వాజిని సిక్కుదాన్ వరిజ్ డిసిపిస్తెజె, క్రీస్తు సాతాన్.

16 ఉండ్రె తీర్మన పత్రం రాస్తె ఇడ్డిమహిజ, అయా తీర్మన పత్రం తయార్ కితికాన్ సాత మనాన్ ఇజి రుజుప్ అదెజ్.

17 అయాక రాస్తెమన్నికాన్ బత్కిజి మహిజ, అయా తీర్మన పత్రమ్మదిజ్ విలువ సిల్లెద్. వాండ్రు సాతివెనుకానె అయా తీర్మన పత్రం పణిదిజ్ వానాద్.

18 అందెజె, మొదొల్ సిత్తి ఒపుమానమ్మదిజ్బా నల సిల్లెండ సత్తు మన్ ఏద్.

19 దేవుణు వెహ్తి రూలుజ్ విజు, లోకురిజ్ విజేరిజ్ సిత్తివెనుక, మోసె దూడెజ నల, ఏరువెట కలవ్తాండ్రె, ఇసొపు మొక్కాది కొముదాన్, నండొ ఎరాని బులుస్కుదాన్ లోకుర్ విజేరె ముస్కు, దేవుణు రూలుజ్ రాస్తె ఇడ్డి పుస్తకం ముస్కు సిల్కరిస్తాన్.

20 వాండ్రు వెహ్తాన్, “మీరు కిదెజ్ ఇజి దేవుణు ఆడ్ర సిత్తి ఒపుమానమ్మదిజ్ ముద్దనె యా నల”☆, ఇజి.

21 అయాలెకెండె, గుడారం ముస్కుని అబ్బె మన్ని విజు వనకాజ్ ముస్కు నల సిల్కరిస్తాన్.

22 మోసె సిత్తి రూలుదు వెహ్సిని వజ విజు నలదాన్ సుబ్బరం ఆనాద్ ఇజి వెహ్తాజ్ ఆనాద్. నల వాక్ ఏండ, పాపమ్మకు సొన్ ఉ.

23 అందెజె, పరలోకమ్మదు మన్ని వనకాజ్ రూపు లెకెండ మన్ని లోకమ్మది గూడారమ్మని దన్ని లొఇ మనికెజ్, జంతుజ నలదాన్

సుబ్బరం ఆదెజ్ వలె. గాని పరలోకమ్దు మనికెజ్ జంతుజ నలదాన్ ఆవండ, దన్నిజ్ ఇంక నెగ్గి పూజెజాణిజ్ సుబ్బరం ఆదెజ్ వలె.

24 ఎందనిజ్ ఇహిజ, క్రీస్తు పరలోకమ్దు సాహన్. ఏలు మా వందిజ్ దేవుణు ఎద్రు జామ్లి నిల్సిని వన్నిలెకెండ్ నిల్దెజ్ సాహన్. వాండ్రు లోకుర్ కీదాన్ తయారాతి గుడారమ్దు డుగ్గవితాన్. అయాక నిజమాతి గుడారమ్ది ఉండ్రి మూర్చినె.

25 యూదురిజ పెరి పుజేరి, ఏంటు ఏంటు జంతుజ నలదాన్ దేవుణు వందిజ్ ఒదె కేట ఆతి గదిదు డుగ్గన్. గాని, యేసు వన్నిజె ఒపజెపె ఆదెజ్ మరి మరి పరలోకమ్దు సాన్వన్.

26 ఆహె సాండ్రెజ్ ఇహిజ, లోకం పుటిన్ బాణిజ్ అసి, వాండ్రు మరిమరి సాదెజ్ మహద్ మరి. గాని కాలమ్ది ఆకార్దు, వాండ్రు పూజ ఆతి దన్నిదటాన్, పాపం సిల్లెండ కిదెజ్, వాండ్రు ఎలాకాలం వందిజ్ ఉండ్రి సుటు తోరె ఆతాన్.

27 లోకుర్ విజేరి ఉండ్రి సుటు సాదెజ్ వలె. వెనుక దేవుణు బాణిజ్ తిర్పు జర్గిదెజ్ వలె, ఇజి ఏర్పాటు మనాన్.

28 అయాలెకెండ్, నండొండారి పాపమ్కు సాన్పిస్తెజ్, క్రీస్తు పూజ ఆతాన్. వాండ్రు మరి మర్జి వానాన్, పాపమ్కు సాన్పిస్తెజ్ ఆవద్; గాని వన్నిజ్ ఆసదాన్ ఎద్రుసుడేజి మంజిని వరిజ్ రక్సిస్తెజె వానాన్.

10

క్రీస్తు ఎలాకాలం వందిజ్ ఉండ్రి సుటు పూజ ఆతాన్

1 మోసె సితి గూలుజ్దు మని పడాఱి ఆసారమ్కు, వాని కాలమ్దు వాజిని నెగ్గి సజతిజ ఉండ్రి నీడెనె. అయాకెజ్ నిజమాతి సజతిజ్ ఆఉ. అందెజె పడాఱి ఆసారం వజ కిని పూజెజ్, డిన్ఎండ ఏంటు ఏంటు కిజి మహర్. గాని దేవుణుదిజ్ పొగిడిజి మాడిస్తెజ్ వాని వరిజ్ పూర్తి సుబ్రం కిదెజ్ అట్ఉ.

2 దేవుణుదిజ్ పొగిడిజి మాడిస్తెజ్ వాతి లోకుర్, వరి పాపమ్దాన్ పూర్తి సుబ్రం ఆతార్ ఇహిజ, వారు మరి మరి పాపమ్క వందిజ్ ఎత్తు కిజి బాద ఆవెతార్ మరి. విజు పూజెజ్బా ఆప్ ఆతె మరి.

3 గాని యా పూజెజ్, ఏంటు ఏంటు, లోకురిజ్ వరి పాపమ్కు ఎత్తు కిబిన్నె.

4 ఎందనిజ్ ఇహిజ, కొడ్డిజ, గొర్రెజ నల పాపమ్కు సొన్పిస్తెజ్ అట్టె.

5 అందెజె, క్రీస్తు యా లోకుమ్దు వాతివలె వాండ్రు దేవుణుదిజ్ వెహ్లాన్, “పూజెజ్ని సందెజ్, నీను కోరిజ. గాని నీను నా వందిజ్ ఉండ్రీ ఒడ్డోల్ తయార్ కితి”.

6 మాలి పీట ముస్కు సుప్తి జంతుజాణిజ్ నీను సర్ద ఆఇ. పాపమ్కు సొన్పిస్తెజ్ సీజిని పూజెజాణిజ్ సర్ద ఆఇ, ఇజి.

7 నస్తవలె నాను వెహ్లా, “ఓ దేవుణు, ఇదిలో నాను దేవుణు మాటదు నా వందిజ్ రాస్తి మని వజ, నాను కిదెజ్ ఇజి నీను కోరిజినికెజ్ కిదెజ్ నాను వాత మన్న”, ☆ ఇజి.

8 ముజాలె వాండ్రు వెహ్లాన్, “పూజెజ్ని సందెజ్ పూజ సీని పెటె ముస్కు సురుజిని జంతుజని పాపమ్కు సొన్పిస్తెజ్ సీని పూజెజ్ నీను కోరిజ. వన్యాణిజ్ నీను సర్ద ఆఇ”, ఇజి. (మోసె సితి రూలుజ వజ యా పూజెజ్ కిదెజ్ మనికాదె. గాని వాండ్రు అయాలెకెండ వెహ్లాన్)

9 వెనుక వాండ్రు వెహ్లాన్. “ఇదిలో నీను కోరిజినికెజ్ కిదెజ్ నాను వాత మన”, ఇజి. అందెజె, దేవుణు పడాయి పూజెజ్ విజు సిల్లెండ కిజి, క్రీస్తు పూజ ఆతి దనిజ్ పడాయి పూజెజ ముస్కు ఇడ్డినాన్

10 దేవుణు కోరితికెజ్ వాండ్రు కిత్తాన్. అందెజె యేసు క్రీస్తు ఒడ్డోల్దాన్ ఎలాకాలం వందిజ్ ఉండ్రీ సుటు పూజ ఆతి దనిదాన్, మాటు పాపమ్కాణిజ్ సుబ్రం ఆత మనాట్.

11 యూదురి పుజెరిజు విజెరె, మాలి పీట ముజాలె నిల్సి, రోజు రోజు వరి పుజెరి పణి కిజినార్. మరి మరి ఉండ్రె నని పూజెజె కిజినార్. అయా పూజెజ్ ఎనిజ్బా పాపమ్కు సొన్పిన్ఉ.

12 గాని క్రీస్తు ఎలాకాలం వందిజ్ దేవుణుదిజ్ ఉండ్రీ పూజ ఆతాన్. వాండ్రె అయా పూజ ఆతాన్. ఎలాకాలం వందిజ్ పూజ ఆతాన్. వెనుక వాండ్రు దేవుణు ఉణెర్ పడకాద్, గొప్ప మర్యాద్దు బసె ఆతాన్.

13 అబ్బె, ఏలు క్రీస్తు పడిఁగ వరిజ్, వన్ని పాదమ్క అడిఁగి దేవుణు ఇడ్మిదాక వాండ్రు కాప్ కిజినాన్.

14 ఎందనిజ్ ఇహిజ, అయా ఉండ్రీ పూజదాన్ పాపమ్కాణిజ్ సుబ్బం ఆతి వరిజ్, వాండ్రు ఎలాకాలం పూర్తి ఆతికార్, కిత మనాన్.

15 దేవుణు ఆత్మబా యాక నిజం ఇజి నెసి వెహ్సినాన్. తొలిత వెహ్సినాన్.

16 “వాని దినమ్కాజ్ వెనుక, నాను వరివెట కిని కొత్త ఒపుమానం యాకదె. నాను వరి గర్భమ్దు నా రూలుజ్ ఇడ్పు. వరి మన్సుదు అయాకెజ్ రాన్సు, ఇజి ప్రబు వెహ్సినాన్”, ✧ ఇజి.

17 వెనుక వాండ్రు వెహ్సినాన్, “నాను వరి పాపమ్కు, వరి సెఇ పణిజ్ ఎసెజ్బా ఎత్తు కిఎ”, ✧ ఇజి.

18 దేవుణు పాపమ్కు సెమిసి మహివలె, పాపం సెమిస్తెజ్ మరి పూజ అవునరం సిల్లెద్.

నమ్మిజినె మండ్రెజ్.

19 అందెజె, తంబెరిజాండె, యేసు నల వాక్కి సాతి సాపుదాన్ దేవుణు వందిజ్ ఒద్దె కేట ఆతి గదిదు, మాటు దయ్ రమ్దాన్ డుఁగ్దెజ్ ఆనాద్.

20 వాండ్రు మా వందిజ్, బత్కుదు నడిఁపిసిని ఉండ్రీ కొత్త సరి రేతాన్. అయాక తెరదాన్, ఇహిజ వన్ని సొంత ఒడొల్దాన్ రేతాన్.

21 దేవుణు లోకుర్ మున్సు అతికారం మని ఒరెన్ పెరి పుజెరినె మజి మనాన్.

22 అందెజె, మాటు వన్నిజ్ పూర్తి నమ్మిజి నెగ్గి మన్సుదాన్ దేవుణు ఎర్దు సొనాట్. మజి సుబ్బం కిదెజ్, మా సెఇ పణిజ్ నెసిని మన్సు, క్రీస్తు నలదాన్ సిల్కరెసి ఆత మనాద్. మా ఒడొల్, నెగ్గి ఏరుదాన్ నొరె ఆత మనాద్. ఆహె మాటు దేవుణు ఎర్దు సొనాట్.

23 ఇతల్ ఆతల్ కద్దిఎండ, మటు మనాట్ ఇజి మాటు వెహె ఆజిని ఎద్రు సూణి ఆనదిజ్ డటం అన్నాట్. ఎందనిజ్ ఇహిజ, మా వెట ఒట్టు కితికాన్ నమ్మిదెజ్ తగ్గికాన్.

24 మహికార్ ప్రేమ తోరిస్తెజ్, నెగ్గి పణిజ్ కిదెజ్ వరిజ్ ఉసార్ కిబిస్సిక ఎలాగ ఇజి ఎత్తుకిజినాట్.

25 సెగొండార్ డిసి సీజిని లెకెండ, కూడేజి వాజిని అలవాటు మాటు డిస్తెజ్ ఆవెద్. గాని మాటు ఒరెన్ మరి ఒరెన్ వన్నిజ్ మరి ఒదె దయరం కిబిసి మంజినాట్. ఎందనిజ్ ఇహిజ, ప్రబు వాని దినం డగ్గు ఆజినాద్ ఇజి మీరు సుడేజినిదెర్.

26 నిజం నెస్తి వెనుక మరి మరి పాపమ్కు కిజినాట్ ఇహిజ, అయా పాపమ్కు సొన్పిస్తెజ్ మరి పూజ సిల్లెద్.

27 గాని మరి మనిక ఇనిక ఇహిజ, దేవుణు సీని తీర్పుదిజ్, వన్నిజ్ పడేఇ వరిజ్ నాననం కిని గొప్ప పెరి సిసుదిజ్ ఎద్రు సుడేజినికాదె.

28 మోసె సితి రూలుజ్ లోజిఇతి ఎయె వన్నిజ్బా, రిఎరో, ముఎరో సాక్సిరు వాండ్రు తపు కిత్తాన్ ఇజి వెహిజ, కనికారం తొఎండ నప్పార్.

29 అహిజ, దేవుణు మరిసిజ్ దూసిస్తి వరిజ్ ఎసా పెరి సిక్కు మనాద్. వరిజ్ దేవుణు వందిజ్ కేట కిత్తి నలదిజ్ పణిదిజ్ రెఇ లెకెండ సుడేతి వరిజ్ ఎసా పెరి సిక్కు మనాద్. అయా నలనె ఒపుమానం తపిస్తాద్. కనికారం తొరోసిని దేవుణు ఆత్మదిజ్ దూసిస్తి వరిజ్ ఎసా పెరి సిక్కు మనాద్ ఇజి ఎత్తు కిదు.

30 ఎందనిజ్ ఇహిజ, “సిక్కు నానె సీన. సిక్కుదిజ్ తగితి వరిజ్, నాను మర్జి సీన”, ఇజి వెహి వన్నిజ్ మాటు నెసినాట్. మరిబా వెహిసాన్, “ప్రబునె వన్ని లోకురిజ్ తీర్పు సీనాన్”, ✱ ఇజి.

31 బత్కిజిని దేవుణు కిదు అర్చిక గొప్ప తియెల్ కల్గిస్సి నజతిసె.

32 మీరు క్రిస్తు వందిజ్ తొలిత నెస్తి రోస్సు, ఎసెజ్బా పోన్మాట్. నండో బాదెజ్ వాతిజ్బా, నమ్మకమ్దాన్ ఎలాగ నిహి మహిదెర్ ఇజి ఎత్తు కిదు.

33 సెగం కాలమ్దు, మిజి విజెరె ఎద్రు దూసిస్తార్. మిజి డెయ్తార్. మరి సెగం కాలమ్దు, మీరు, అయాలెకెండ్ బాదెజ్ ఆతి వరివెట కూడ్జి నిహిదెర్.

34 జెలిదు ఆతి వరిజ్ సుడ్జి మీ పాణం నోతాద్. మిజి కల్లిజి మనికెజ్ విజు లాగ్లి ఒతివలెబా సర్దదాన్ ఓరిస్తెదెర్. ఎందనిజ్ ఇహిజు, ఎలాకాలం మనికెజ్, మిజి మన్నె ఇజి నెసినిదెర్. అయాక కల్లితి మహిదని ఇంక మరి ఒదె నెగ్గిక.

35 అందెజె, దయ్రమ్దాన్ మండ్రు. ఎందనిజ్ ఇహిజు నండో పలితం దోహ్కాద్.

36 మీరు ఓరిసి మండ్రెజ్ వలె. ఎందనిజ్ ఇహిజు, మీరు దేవుణుదిజ్ ఇస్టం ఆతికెజ్ కితి వెనుక, వాండ్రు సీన ఇజి ఒట్టు కితికెజ్ దోహ్కె.

37 ఎందనిజ్ ఇహిజు, దేవుణు మాటదు వెహ్నిని లెకెండ్, “సణెం కాలం లొఇ, వాదెజ్ మనికాన్ బేగినె వానాన్. ఆల్సెం ఆవెన్.

38 నీతి నిజాయితి మని నా వారు, నమ్మకమ్దాన్ బత్కినార్. వారు మరజి వెనుక సొహిజు, నాను వరివెట సర్ద అవె”, ✱ ఇజి.

39 మాటు, మరజి వెనుక సొన్ని నాసనం ఆని లోకు ఆవెట్. గాని మజి దేవుణు ముస్సు నమకం మనాద్. వాండ్రు మజి రక్సిస్తాన్.

11

1 నమకం ఇహిజు, మాటు ఆస ఆనిక తప్ఎండ జర్గినాద్ ఇజి పూర్తి నమ్మిజినిక. కణకదాన్ సుడ్జికెజ్ నిజం మన్నె ఇజి పూర్తి నమ్మిజినిక.

2 దేవుణు ముస్సు నమకం ఇడ్తి లోకుర్ పూర్బమ్మదు మహార్. అందెజె దేవుణు బాణిజ్ అనుపె ఆతార్.

3 దేవుణు మాటదానె యా బూలోకం తయార్ ఆత మనాద్ ఇజి నమకమ్దానె మాటు నెసినాట్. ఎందనిజ్ ఇహిజు, మాటు ఏలు సూణికెజ్, సుడ్జి వన్నా బాణిజ్ తయార్ కితికెజె.

4 నమకమ్దానె, కయిను సితి దని ముస్సు ఏబలు దేవుణుదిజ్ నెగ్గి పూజ సితాన్. వన్ని నమకమ్దానె, నీతి నిజాయితి మనికాన్ ఇజి దేవుణు బాణిజ్ మెపు దోహ్కాద్. ఎందనిజ్ ఇహిజు, వాండ్రు

సితి సందదు దేవుణు సర్ద ఆతాన్. వాండ్రు సేనదినమ్కాజ్ ముజాలె సాత సాహాన్. అహిజ్బా, వన్ని నమ్మకమ్దాన్ ఏలు బా మజి వర్రిజినాన్.

⁵ నమకమ్దానె, హనోకు సాఎండ దేవుణు మంజిన బాడ్డిదు దేవుణు ఒత మనాన్. ఎయెర్బా వన్నిజ్ సుడేదెజ్ అట్ఎతార్. ఎందనిజ్ ఇహిజ, దేవుణునె వన్నిజ్ ఒత మహాన్. వన్నిజ్ ఒఇ ముజాలె, దేవుణుదిజ్ సర్ద కితికాన్ ఇజి అనువె ఆతాన్.

⁶ నమకం సిల్లెండ, దేవుణుదిజ్ సర్ద కిబిస్తెజ్ అట్ఎట్. ఎందనిజ్ ఇహిజ, వన్ని డగ్రు వానికాన్ ఎయెన్బా దేవుణు మనాన్ ఇజి నమ్మిదెజ్వలె. వన్నిజ్ నిజం రెబాని వరిజ్ వాండ్రు నెగ్గికెజ్ కిసాన్ ఇజి నమ్మిదెజ్వలె.

⁷ నమకందానె, నోవ వవి ఇండ్రోణి వరిజ్ పెరి గడదాన్ రక్కిస్తెజ్ ఉండ్రీ ఓడ: తయార్ కిత్తాన్. జర్గిదెజ్ మని సజతిజ వందెజ్ దేవుణు డటం వెహ్తావలె వాండ్రు లోజితాన్. వన్ని నమకమ్దానె, లోకమ్దు మహి, మహి లోకురిజ్ దేవుణు ముస్కు నమకం సిల్లెద్ ఇజి వాండ్రు తోరిస్తాన్. అందెజె వారు తపు కిత్తార్ ఇజి దేవుణు తీర్పు కితాండ్రె, నోవెజ్ నీతి నిజాయితి మనికాన్ ఇజి ఇట్టాన్. నోవ నమకమ్దానె నీతి నిజాయితి మనికాన్ ఇజి ఇట్టాన్.

⁸ నమకమ్దానె, అబ్రాహము, 'నీను నీ ఇల్లు డిసి, నీది ఇజి వెనుక దోహ్క్సి బాడిదు సాన్అ', ఇజి దేవుణు వెహ్తావలె, లోజితాండ్రె సాహాన్. ఎంబె సాన్సినాన్ ఇజి తెలిఎండ వాండ్రు సాహాన్.

⁹ నమకమ్దానె, పయువాండ్రు లెకెండ దేవుణు సీన ఇజి ఒట్టు కితి దేనమ్దు బత్కితాన్. వాండ్రు గుడారమ్దు బత్కితాన్. అయాలెకెండె, ఇసాకు ని యాకోబు బా. వరిజ్బా వెనుక అయా ఒట్టునె దేవుణు సితాన్.

¹⁰ అబ్రాహము పయువాండ్రు లెకెండ అబె బత్కితాన్. ఎందనిజ్ ఇహిజ, వాండ్రు ఎలాకాలం నిల్గిని నిజమాతి పునాది మని పట్నం వందెజ్ ఎద్దు సుడేజి మహాన్. అయా పట్నం రూపు సీజి తోహ్పికాన్ దేవుణు.

11 నమకమ్దానె, అబ్రాహము నండొ డొక్క ఆతిజ్బా, సార గొడ్డు బోదెలి ఆతిజ్బా అప్పొసి ఆతాన్. ఎందనిజ్ ఇహిజ, సీన ఇజి ఒట్టు కితికాన్ నమ్మిదెజ్ తగ్గికాన్ ఇజి ఒడిబితార్.

12 అందెజె, సాతిలెకెండ మని యా ఒరెన్ వన్ని బాణిజ్, నండొ నండొ లోకుర్ ఆతార్. ఆగాసమ్దు మని సుకెజి లెకెండ, సమ్దరమ్ది ఒడ్డుదు మని లెక కిదెజ్ అట్ ఇ ఇస్క లెకెండ, లోకుర్ ఆతార్.

13 యా లోకుర్ విజెరె, సానిదాక వారు నమకమ్దానె బత్తిజి మహార్. దేవుణు సీన ఇజి ఒట్టు కితికెజ్ దొహ్కుతె. వారు నండొ ముజాలె వన్కా వందిజ్ ఆసదాన్ ఎద్దు సుడేజి వన్కాజ్ సర్ద ఆతార్. యా బూమిదు వారు పయువారు ఇజి ఒప్పుకొటార్.

14 యా లెకెండ వెప్పి లోకుర్, వరిజ్ సొంత ఉండ్రీ దేసెం వందిజ్ ఎద్దు సుడేజినార్ ఇజి టెటాజ్ తోరిసినాద్.

15 వారు డిసి వాతి దేసెం వందిజ్ ఎత్తు కివెర్. ఎత్తు కిత్తార్ ఇహిజ, మరజి సొండ్రేజ్ అవ్సరం మహద్మరి.

16 గాని వారు, ఇంక నెగ్గి ఉండ్రీ దేసెం వందిజ్ కోరితార్. ఇహిజ పరలోకమ్ది దేసెం వందిజ్ కోరితార్. అందెజె, దేవుణు, వరి దేవుణు ఇజి వెహె ఆదెజ్ సిగు ఆఎన్. ఎందనిజ్ ఇహిజ, వాండ్రు వరి వందిజ్ పరలోకమ్దు ఉండ్రీ పట్నం తయార్ కిత మనాన్.

17 నమకమ్దానె, దేవుణు అబ్రాహముజ్ పరిస కితివలె, వన్ని మరిసి ఇస్సాకుజ్, పూజ లెకెండ సితాన్. దేవుణు అబ్రాహముజ్నె ఒట్టు సితాన్. గాని వన్ని ఒరెండ్రె ఒరెన్ మరిసిజ్ పూజ లెకెండ సీదెజ్ వాండ్రు తయార్ ఆతాన్.

18 దేవుణు అబ్రాహముజ్ వెహ్తాన్, “ఇస్సాకు వెటనె నీ తెగ్గదికార్ పుట్నార్”,☆ ఇజి

19 సాతి వరిజ్ మరజి బత్తిస్తెజ్ దేవుణు అట్నాన్ ఇజి అబ్రాహము ఒడిబితాన్. యాక సుడేతిజ, అబ్రాహముజ్ సావుదాన్ ఇస్సాకుజ్ మరజి దొహ్కె లెకెండె మనాద్.

☆ 11:18 11:18 అది 21:12.

20 నమకమ్దానె, ఇస్సాకు, యాకోబుజ్ని యాసావుజ్, వరిజ్ వానికాలం వందిజ్ దీవిస్తాన్.

21 నమకమ్దానె, యాకోబు వాండ్రు సాని ముజాలె యోసేపు మరిసిర్ రివెరిజ్ దీవిస్తాన్. వన్ని డుడుదు ఒర్గితాండ్రె దేవుణుదిజ్ పొగిడిజి మాడిస్తాన్.

22 నమకమ్దానె, యోసేపు సాదెజ్ డగ్రు ఆతివలె ఇస్రాయేలు లోకురిజ్ అయిగుప్తు దేసెమ్దాన్ దేవుణు నడిపిసి తనిదని వందిజ్ వెప్తాన్. వన్ని డుముక వందిజ్ ఇనిక కిదెజ్ ఇజి ఆడ్ర సితాన్.

23 నమకమ్దానె, మోసె అయిసి అప్సొసిర్, వాండ్రు పుట్టి మూంత్రి నెలెజ్ డాప్సి ఇట్టార్. ఎందనిజ్ ఇహిజ, వాండ్రు నెగ్గి ఒరెన్ కొడొః ఇజి వారు నెస్తార్. రాజు సితి ఆడ్రదిజ్ తప్తెజ్ వారు తియెల్ ఆవెతార్.

24 నమకమ్దానె, మోసె, వాండ్రు పిరితి వలె పరో గాల్సి మరిసి ఇజి కూకె ఆదెజ్ కెవెతాన్.

25 వాండ్రు, పాపం తపిన్ని సణెం మంజిని సర్దదు మంజిని దని ముస్సు దేవుణు లోకుర్ వెట బాద ఆదెజ్ కోరితాన్.

26 అయ్గుప్తు దేసెమ్ది ఆన్తి ముస్సు, క్రిస్తు వందిజ్ బాదెజ్ ఆనికాదె విలువ మనిక ఇజి వాండ్రు ఒడేబితాన్. ఎందనిజ్ ఇహిజ, వాని కాలమ్దు దేవుణు వన్నిజ్ కిని నెగ్గి దని వందిజ్ వాండ్రు ఎద్రు సుడేతాన్.

27 నమకమ్దానె, మోసె, రాజు కోపమ్దిజ్ తియెల్ ఆవండ, అయ్గుప్తు దేసెం డిస్తాన్. వాండ్రు మర్జి వాదెజ్ కెవెతాన్. ఎందనిజ్ ఇహిజ, వాండ్రు తోర్ఇ దేవుణుదిజ్ సుడేతి లెకెండె మనాద్.

28 నమకమ్దానె, మోసె, ఇస్రాయేలు లోకురిజ్ పులాజ్ ఆఇ రొటెజ్ తయార్ కిని పండొయి కిదెజ్ ఇజి ఆడ్ర సితాన్. వరి తొలిత పుట్టి కొడొఃరిజ్, సన్ని దూత సప్ఎండ మండ్రెజ్, వరి దార్బందరమ్దు నల సిల్కర్నిజ్ ఇజి ఆడ్ర సితాన్.

29 నమకమ్దానె, ఇస్రాయేలు లోకుర్ ఎర్రజ్ నమ్దరమ్దాన్ వప్తా బూమిదు నడిసి లెకెండ నడిసి సాహార్. అయ్గుప్తు దేసెమ్దికార్ అయాలెకెండ కిదెజ్ సుడేతి వలె వారు ముడుగితార్.

30 నమకమ్దానె, ఇస్రాయేలు లోకుర్ ఏడు రోస్సు యెరికొ పట్నం నుటులం బూలాతివలె, పట్నమ్ది గోడెజ్ అర్తె.

31 నమకమ్దానె, సాని బూలాని రాహబు, దేవుణుదిజ్ లోజిఇ దని పట్నమ్ది వరివెట సావెతాద్. ఎందనిజ్ ఇహిజ, దేసెమ్దిజ్ గుటు లాగ్దెజ్ వాతి వరిజ్ అది డగ్గు కితాద్.

32 నాను మరిబా వెహ్తాజా? గిదియెను, బరాకు, సంసాను, యెష్ట, దావీదు, సముయేలు, ప్రవక్తరు నిని వరి వందిజ్ వెహ్తాజ్ నజీ సమయం సాల్వెద్.

33 నమకమ్దానె, వారు దేసెమ్కాజ్ ముస్సు విద్దెం కిజి గెలస్తార్. వారు నీతి నిజాయితికెజ్ కితారె, దేవుణు ఒట్టు కితికెజ్ దొహ్కె. వారు నొరెస్సు వెయ్యు మూక్తార్.

34 నండొ కన్నె సిసుదిజ్ నప్తార్. కూర్దెజాణిజ్ సాఎండ తప్రె ఆతార్. వారు సత్తుసిలికార్ గాని సత్తు మనికార్ ఆతార్. వారు విదెమ్దు సత్తు మనికార్ ఆతార్ పయి సయెనమ్ది వరిజ్ ఉలుప్తార్.

35 సెగొండెక్ బోదెకాజ్, వరి సొంతది వరిజ్ సావుదాన్ మర్జి దొహ్కె. మహికార్ నండొ బాదెజ్ ఆతిజ్బా, వారు దేవుణు ముస్సు మని నమకం డిసి, డిబె ఆని దని ముస్సు సానిక నెగెద్ ఇజి సుడెజ్తార్. ఎందనిజ్ ఇహిజ, వారు మర్జి నిజ్ని వలె నెగ్గి బత్సు దొహ్కెజ్.

36 సెగొండార్ దూసె ఆతార్. కొరడెజాణిజ్ డెయ్ఎ ఆతార్. మరి సెగొండార్ తొహె ఆతారె, జెలిదు ఇడ్డెజ్ ఆతార్.

37 వారు ప్రణకాణిజ్ డెయ్ఎ ఆతార్. రంపమ్కాణిజ్ రుండి ముకెజ్ కొయె ఆతార్. కుర్దెజాణిజ్ సపె ఆతార్. సెగొండార్ మెండ గొర్రెదినొ, ఏలెటు గొర్రెదినొ తోలు పొర్పె ఆజి, బజ ఆజి, బాదెజ్ ఆజి, దూసె ఆజి బూలాతార్.

38 యా నెగ్గి లోకుర్ మండ్రెజ్, యా లోకం తగ్వెద్. వారు బీడిమ్ బూమిజ, గొరొకాజ్ బూలాతార్. సాలమ్క లోఇ, బూమిదు మని బొరొజ డాజితార్.

39 వారు నమకం ఇట్టార్. అందెజె, నెగ్గికార్ ఇజి దేవుణు బాణిజ్ మెపు దొహ్కాద్. గాని వరి లోఇ ఎయెరిజ్బా, దేవుణు సీన ఇజి ఒట్టు

కితికెజ్ దొహ్కుతె.

⁴⁰ ఎందనిజ్ ఇహిజు, దేవుణు మా వందిజ్ ఇంక నెగ్గిక ఏర్పాటు కిత మనాన్. మా వెటనె, వరిజ్ పూర్తి కిదెజ్ ఇజి వన్ని ఉదెసం.

12

దేవుణు వన్ని కొడొరిజ్ దిదిజి సిక్కు సీజినాన్

¹ అందెజె, మా నుటులం సేన సాక్కిరు మనార్. అందెజె, అడు కిజిని సజతిజు డిసి, మజి సిక్కుజు అర్పేసిని పాపం డిసి, దేవుణు మా ఎదు ఇడ్తి బత్తు ఇని ఉహ్క్కి పోటిదు ఓరిసినె ఉహ్క్కాట్.

² మా గురి యేసు దరోట్నె ఇడొజి ఉహ్క్కాట్. వాండ్రె మా నమకం మొదొల్స్తికాన్. పూర్తి కినికాన్. వాండ్రు సిలువాదు సిగు మని సాపు సాదెజ్ తయార్ ఆతాన్. ఎందనిజ్ ఇహిజు, వెనుక వన్నిజ్ మంజిని సర్ద వాండ్రు నెస్సాన్. ఏలు పరలోకమ్దు దేవుణు సిమసనం ఉణెర్ పడకాదు గొప్ప మర్యాద్దాన్ బస్త మనాన్.

³ పాపం కినికార్ కితి నండొ బాదెజ్ వాండ్రు ఓరిస్తికెజ్ ఎత్తు కిదు. అందెజె, మీరు మన్ను విస్కిఎండ, డిసిసిఎండ మండ్రెజ్, వన్నిజ్ ఎత్తు కిదు.

⁴ పాపం వెట కాట్లాడొజినిక నల సీని నసా ఏలుదాక మీరు ఎద్రిన్ ఇతిదెర్.

⁵ దేవుణు వన్ని కొడొర్ లెకెండ్ మిజి ఉసార్ కిబిస్సి మాట మీరు పోస్తిదెరా?. “నా కొడొ, ప్రబు నిజి దిదిని వలె మన్ను బాద కిమాట్. వాండ్రు డటం వెహ్ని వలె మీ మన్ను విస్కిమాట్.

⁶ ఎందనిజ్ ఇహిజు, ప్రబు వాండ్రు ప్రేమిసిని వరిజ్ దిదినాన్. వన్ని మర్న్ ఇజి డగ్గు కిని వన్నిజ్ దిదినాన్[☆], ఇజి వెహ్నినాన్.

⁷ ఒరెన్ అప్పొసి దిదిని వజు, మీ సైమెజ్ ఓరిస్తు. ఎందనిజ్ ఇహిజు, మీ సైమెజ్, దేవుణు మిజి వన్ని కొడొర్ లెకెండ్ సుడొజినాన్ ఇజి తోరిస్సి. అప్పొసి దిదిని మరిసి ఎయెన్బా మనాండ్రా?

☆ 12:6 12:6 సామెత 3:11-12.

8 వన్ని మరిసిర్ విజెరిజ్ దిజినిలెకెండ, మిజి దిదిఎండ మహిజ, మీరు వన్ని నిజమాతి కొడోర్ ఆఎర్. గాని ఆఇ కొడోర్ ఇజినె అర్దం.

9 మజి విజెరిజ్ కాన్తి అప్పాసిర్ మహార్. వారు మజి దిదిజి మహార్. మాటు వరిజ్ గవరం సీజి మహార్. అహిజ, మా అయా లోకమ్ది బుబ్బ ఆతికాన్దిదినివలె, ఎసా లావు వన్నిజ్లోజిజి మాటు ఎలాకాలం బత్తిదెజ్?

10 మా బుబ్బర్, సెగం కాలం మజి దిదితార్. ఎందనిజ్ ఇహిజ అయాక నెగిద్ ఇజి వారు ఒడ్జిబితార్. గాని, మా నెగ్గిదనివందిజ్ దేవుణు మజి దిదిజినాన్. ఎందనిజ్ఇహిజ, మాటు వన్నిలెకెండ పరిసుదమ్క మండ్రెజ్.

11 మజి దిదినివలె, అయాక సర్ద కిబిన్ఎద్, దుకం కిబిస్సాద్. గాని అయాలెకెండ దిదిజి సిక్కు లాగె ఆజి నెగ్గి సరిదు వాతికార్, వెనుక నీతి నిజాయితిదాన్ కిజి, సమాదనందాన్ మంజినార్.

12 అందెజె, డిఃప్తి* మీ కికు పెర్దు. వణక్కిని ముణుకుజ్ సత్తు కిబిస్తు†.

13 “మీ కాల్యాజ్ తినాజ్ సరి తయార్ కిదు”☆. సొట కాల్యు బెణ్ఎండ, సత్తు ఆని వందిజ్ తినాజ్ సరి తయార్ కిదు.

దేవుణుదిజ్ నెక్కి పొక్మాట్

14 విజెరె వెట సమాదనమ్దాన్ కూడ్జి పాడ్జి మండ్రెజ్ సుడ్జెదు. పాపం కిఇ, దేవుణు వందిజ్ కేట ఆతి బత్తు బత్తిదెజ్ సుడ్జెదు. ఎందనిజ్ ఇహిజ, అయాలెకెండ బత్తిఇకాన్, ప్రబుజ్ సుడ్జెఎన్.

15 ఎయెన్బా దేవుణు బాణిజ్ వాజిని వన్ని దయా దర్మం తప్పి సాన్ఎండ జాగర్త సుడ్జెదెజ్. ఉండ్రీ సేందు మొక్కు పిరిసి దని సేందు నండొండారిజ్ బాద కినిలెకెండ, ఎయెన్బా ఆవండ జాగర్త సుడ్జెదెజ్.

* 12:12 12:12 దిని అర్దం ఇనిక ఇహిజ, కష్టమ్కు వాని వలె మీరు మనుసు విస్సిఎండ దయరమ్దాన్ నిల్ద ఇజినె. † 12:12 12:12 ప్రమెజ్ వాని వలె, మన్ను విస్సిఎండ దయరమ్దాన్ నిల్లి మండ్రు ఇజినె అర్దం. ☆ 12:13 12:13 సామెత 4:26.

16 సావు లెకెండ్ సాని బూలాజినో, దేవుణు వందిజ్ బక్తి సిల్లెండనో, ఎయెన్బా మన్ఎండ జాగర్త సుడేదెజ్. వాండ్రు ఉండ్రి పుటా తిండి వందిజ్, వన్ని పెరి మరిసి ఇని అక్కు పొర్తాన్.

17 మీరు నెసిని లెకెండ్, వెనుక వన్ని అప్పొసి. సీని దీవెనమ్కు వాండ్రు కోరితివలె, వాండ్రు నెక్కి పొకె ఆతాన్†. ఎందనిజ్ ఇహిజు, వాండ్రు కితిక మారిస్తెజ్ వాండ్రు అట్ఎతాన్. వాండ్రు నండొ అడబాజి దీవెనమ్కు లొస్తిజ్బా దొహ్కుతె.

18 మీరు, ఇస్రాయేలు లోకుర్ సీనాయి గొరొన్ డగ్రు వాతి లెకెండ్ రెఇతిదెర్. ముట్టి నెస్తెజ్ ఆని, సిసు కసిసి, గొప్ప సీకట్మని, తుపాన్ మని గొరొన్ డగ్రు రెఇతిదెర్.

19 వారు, జోడుబాంకెజ్ ఊహ్క్సి పెరి జాటు, వర్గిని జాటు వెహర్. అయ్యాక వెహివలె, మరి వరివెట వర్గిమా ఇజి దేవుణుదిజ్ బతిమార్తార్.

20 ఎందనిజ్ ఇహిజు, “ఉండ్రి జంతు అతిజ్బా, గొరొతు మట్టిజు, దనిజ్ పణకాణిజ్ డెయిజి సస్తెజ్”☆, ఇజి దేవుణు వెహ్తా ఆడ్ర ఓరిస్తెజ్ అట్ఎతార్.

21 అబ్బె తోరె ఆతిక, గొప్ప తియెల్ కల్గిస్సిక. అందెజె మోసె వెహ్తాన్, “నాను గొప్ప తియెల్ ఆజి వణక్సిన”, ఇజి. నని గొరొన్ డగ్రు ఆవద్ మీరు వాతిదెర్.

22 గాని మీరు, సియెను గొరొత్నె వాతి మనిదెర్. బత్కిజిని దేవుణు మంజిని పట్నమ్దునె వాతి మనిదెర్. ఇహిజు, పరలోకమ్ది యెరూసలెమ్దునె వాతి మనిదెర్. సేన దూతార్ సర్దాన్ కూడితి మని బానె, వాతి మనిదెర్.

23 దేవుణు తొలిత కొడొర్, కూడితి మని బానె వాతి మనిదెర్. వరి పేర్కు పరలోకమ్దు రాస్తె ఇడ్డె మన్నె. మీరు దేవుణు డగ్రునె వాతి మనిదెర్. వాండ్రె విజెరిజ్ తీర్పు సీనికాన్. పరలోకమ్దు మని నీతి నిజాయితీ మని వరి పాణమ్క, డగ్రునె వాతిమనిదెర్. వారు పూర్తి కిబె ఆతికార్.

† 12:17 12:17 మరి ఉండ్రి రకం వెహ్తాజు, వాండ్రు కిత్తి తప్పు ఒప్పుకొండెజ్ వన్నిజ్ అట్ఎండ ఆతాద్ ఇజి. ☆ 12:20 12:20 నిర్గమ 19:12,13.

24 మీరు యేసు డగ్రునె వాతి మనిదెర్. వాండ్రె, అయా కొత్త ఒప్పుమానం నడిపిస్సికాన్. మీరు, సిల్కరెసె ఆతి నల డగ్రు వాతి మనిదెర్. ఏబేలు నల వెహ్సిని దన్నిముస్సు నెగ్గి మాట వెహ్సిని నల డగ్రు వాతి మనిదెర్.

25 అందెజె, మీ వెట వర్గిజిని దేవుణుదిజ్ జాగర్త వెండ్రు. యా లోకమ్దు, దేవుణు డటం వెహ్వావలె వెండ్రెజ్ కెఇతి ఇస్రాయేలు లోకుర్, దేవుణు సీని తీర్పుదాన్ తప్రె ఆదెజ్ అట్ఎతార్ ఇహిజ, పరలోకమ్దాన్ డటం వర్గిజిని వన్నిజ్ నెక్తి పొక్తిజ, మాటు సిక్కుదాన్ తప్రె ఆదెజ్ అట్నూట?.

26 దేవుణు, సీనాయి గొరొత్దాన్ వర్గితివలె, బూమి కద్దితాద్. గాని ఏలు వాండ్రు ఒట్టు కిత మనాన్. “మరి ఉండ్రీ సుటుబా, నాను బూమిదిజ్నె ఆవిండ, ఆగాసమ్దిజ్బా కద్లిన్నలె”☆ ఇజి.

27 ‘మరి ఉండ్రీ సుటుబా’, ఇని మాటదిజ్, కద్దినికెజ్ మారిన్నె ఇజినె అర్దం. ఇహిజ, తయార్ కితికెజ్ కద్దిజి మారె ఆనె ఇజి. ఎందనిజ్ ఇహిజ, కద్లికెజ్ ఎలాకాలం మండ్రెజ్.

28 అందెజె దేవుణు ఏలుబడిః ఎసెజ్బా కద్లిఎద్. అందెజె☆ దేవుణుదిజ్ వందనం వెహ్సి తియెల్దాన్ గవ్ఠమ్దాన్, వాండ్రు సర్దద ఆని వజ మాడిఃస్నాట్.

29 ఎందనిజ్ ఇహిజ, “మా దేవుణు సుర్ని సిసు ననికాండ్రె.

13

దేవుణుదిజ్ ఎలాగ సర్దద కిబిస్సెజ్

1 క్రీస్తు వెట కూడిఃతి మని తంబెరిజు ఇజి, ఒరెన్ మరి ఒరెన్ వన్నిజ్ ప్రేమిసినె మండ్రు.

2 నెన్ఇ వరిజ్ డగ్రు కిదెజ్ పోస్మాట్. యా లెకెండ డగ్రు కిజి, సెగొండార్, నెన్ఎండనె దూతారిజ్ డగ్రు కిత్తార్.

3 జెలిదు మని వరిజ్ ఎత్తు కిదు. మీరు వరి వెట బాన్ మహివజ ఎత్తుకిదు. బాద అని వరిజ్ ఎత్తు కిదు. మీరు వరి లెకెండ్ బాద అజి మహివజ వరిజ్ ఎత్తు కిదు.

4 పెండ్లిదిజ్ విజెరె గవరం సీదెజ్వలె. అల్ని మాసిర్ రిఎర్బా, ఒరెన్ మరి ఒరెన్ వన్నిజ్ నమ్మిదెజ్ తగ్ని వరిలెకెండ్ మండ్రెజ్ వలె, సాని బూలాని వరిజ్, రంకు బూలాని వరిజ్ దేవుణు తవ్వెండ సిక్స సీనాన్.

5 డబ్బుదిజ్ అస అమాట్. మిజి కల్లితి మనిదనితాన్ సర్ద ఆదు. ఎందనిజ్ ఇహిజ, దేవుణు వెహ్తా మనాన్, “నాను ఎసెజ్బా మిజి డిఃన్ఎ, నాను ఎసెజ్బా మిజి నెక్కి పొక్ఎ”, ✧ ఇజి.

6 అందెజె దయరమ్దాన్ వెహ్తెజ్ అట్నాట్, “ప్రబునె నజి తోడుః. నాను తియెల్ ఆఎ. లోకు నజి ఇని కిదెజ్ అట్ఎర్” ✧.

7 దేవుణు మాట మిజి వెహ్సి, మిజి నడిఃపిసిని వరిజ్ ఎత్తు కిదు. వరి బత్కుదాన్ వాతి విజు నెగ్గి దని వందిజ్ ఎత్తు కిదు. వారు నమ్మిత్తి లెకెండ్ నమ్మిదు.

8 యేసు క్రిస్తు ఇవన్, నేండ్రు, ఎలాకాలం ఉండ్రె లెకెండ్ మంజినాన్.

9 విజు రకమ్కాణి నెన్ఇ బోదెజ వెట సొన్మాట్. దేవుణు దయా దర్మమ్దాన్ మా మన్సు సత్తు అనికాదె నెగెద్. తిండి వందెజ్ మని రూలుజ లోజిజి ఆఎద్. అయాకెజ్ లోజితి వరిజ్ ఇని లాబమ్బా రెఎద్.

10 మజి ఉండ్రీ పూజ సీని మాలి పీట మనాద్. దని బాణిజ్, గుడారమ్దు సేవ కిజిని పుజెరిజ తిండ్రెజ్ అక్కు సిల్లెద్.

11 యూదురి రూలు వజ, విజు పుజెరిజ మున్సు మని పెరి పుజెరి పాపం వందిజ్ పూజ లెకిండ్ జంతుజ నల దేవుణు వందిజ్ ఒద్దె కేట అతి గదిదు తనాన్. గాని కండ పట్నం వెల్లి సుర్పార్.

12 అందెజె, యేసుబా పట్నమ్ది వెల్గు వెల్లి బాద ఆతండ్రె సాతాన్. వన్ని సొంత నల వాక్కి వన్ని లోకురిజ్ పాపం సిలివరి లెకెండ్ కిదెజ్ వాండ్రు పట్నమ్ది వెల్గు వెల్లి బాద ఆతండ్రె సాతాన్.

13 అందెజె మాటు పట్టుం వెల్గు వెల్లి వన్ని డగ్రు సొన్ని వాండ్రు లాగె ఆతి సిగుదు వన్నివెట కూడ్నాట్.

14 ఎందనిజ్ ఇహిజ యా బూమిదు మజి ఎలాకాలం మని ఉండ్రి పట్టుం సిల్లెద్. వాదెజ్ మని పట్టుం వందిజ్ మాటు ఎద్రు సుడఃజినాట్.

15 అందెజె, యేసు పేరుదాన్, పూజ లెకెండ్ దేవుణుదిజ్ ఎస్తివలెబా పొగిడిఃజినాట్. ఇహిజ, వాండ్రు ప్రబు ఇజి మా వెయ్దాన్ ఒప్పుకొడిఃజిని పూజ సీనాట్.

16 మహి వరి వందెజ్ నెగ్గికెజ్ కిదెజ్, వరిజ్ సాయం కిదెజ్ పొస్మాట్. ఎందనిజ్ ఇహిజ, నిని పూజెజ దేవుణు సర్ద ఆనాన్.

17 మీ అతికారిజ మాటెజ్ వెండ్రు. వరి అతికారమ్దిజ్ లొజిదు, వారు మిజి జాగర్త సూణార్. ఎందనిజ్ ఇహిజ వరి పణిదిజ్ దేవుణుదిజ్ లెక్క ఒవజెప్తెజ్ ఇజి వారు నెస్సార్. మీరు వరిజ్ లొజితిజ, వారు సర్దదాన్ వరి పణిజ్ కినార్. సిలిజ వారు దుకమ్దాన్ కినార్. అయాకెజ్ మిజి నెగికెజ్, సిఉ.

18 మా వందిజ్ పార్దనం కిదు. మా గర్బం మజి గదిన్ఎండ మన ఇజి మాపు పూర్తి నమ్మిజినాప్. మాపు కిజిని దని లొఇ నెగ్గెండ విజు కిదెజ్ కోరిజినాప్.

19 దేవుణు బేగినె నజి మీ డగ్రు మర్జి తలెజ్ మీరు మరి లావు పార్దనం కిదెజ్ ఇజి నాను ముకెలం బతిమాల్జిన.

20-21 దేవుణు మా ప్రబు ఆతి యేసుజ్ సావుదాన్ నిక్తాన్. వాండ్రె గొరెజ పెరి గవుడుఎన్. ఎందనిజ్ ఇహిజ, వాండ్రు వన్ని నల వాక్తాండ్రె సాతాన్. వన్ని నలదాన్ వాండ్రు ఎలాకాలం వందిజ్ ఒప్పుమానం ముద్ద కిత్తాన్. లోకురిజ్ సమాదనం సీని దేవుణు, వన్నిజ్ ఇన్ఘం ఆతికెజ్ కిదెజ్, మిజి నెగ్గికెజ్ వాదెజ్ సాయం కిపిన్. యేసు క్రిస్తు సత్తుదాన్, వన్నిజ్ ఇన్ఘం ఆతికెజ్ విజు మా లొఇ కిపిన్. వన్నిజ్ ఎల్లకాలం గవరం మనిద్. ఆమెన్.

22 తంబెరిజాండె, నాను మిజి ఉండ్రి ఇజ్రి ఉత్తమ్నె రాస్త మన. అందెజె, నాను పణన్సి మాటెజ్ జాగర్త వెండ్రు ఇజి ఉసార్ కిబిన్.

23 మా తంబెరి ఆతి తిమోతి జెలిదాన్ డిఃబె ఆతాన్ ఇజి మీరు నెస్టెజ్ ఇజి నాను కోరిజిన. వాండ్రు ఇబ్బె బేగి వాతిజ, మిజి సుడఃదెజ్

వన్నిజ్బా నా వెట తన.

²⁴ మిజి నడిఃపిసిని విజెరిజ్, దేవుణు లోకుర్ విజెరిజ్ నాను వెన్బాతి లెకెండ్ వెప్తు. ఇటలిదు మని నమ్మిత్తికార్ మిజి వెన్బాతి లెకెండ్ వెహ్సినార్.

²⁵ దేవుణు దయా దర్మం మీ విజిదెరె వెట మనీద్.

Konda: కొండ బాసదు నెగ్గి కబ్బు
Konda Dora New Testament which was published in
2006

copyright © 2006 Wycliffe Bible Translators, Inc.

Language: Konda-Dora

Contributor: SIL International (in Asia)

All rights reserved.

2025-05-06

PDF generated using Haiola and XeLaTeX on 19 Dec 2025 from source files
dated 7 May 2025

840896da-3a66-5e43-9018-4a95a349d60c